

MENGOAHA E

SUPILENG EA KEREKE

 ...Morena Jesu ea bokoang. 'Me ke emetse masiu ana a itseng, tšebeletso ka litebello tse kholo, ho tšepa hore ka tsela e mokhoa o e itseng, Ntate oa rona ea Maholimong o tla bososella mahlohonolo a Hae ho rona. 'Me khafetsa e kana ke fumana monyetla oa ho kena ho tšoara litšebeletso tsena mona ka—ka kerekeng, le sehlopha, lona bathoana, sehlopha seo e leng maloko a kereke mona, le baeti, ehlile.

² 'Me taba ena ha e a phatlalatsoa. E ne e le kopano ea tloaelo ea Laboraro bosiu feela. 'Me ka re, "Mohlomong bosiusing bona re tla fumana haeba re tla khutla na." 'Me ke itse re e fetisitse, mohlomong, le ho e tsebisa bakeng sa veke e tlang, khele, e ka . . . Ha re khone ho lulisa batho ba bangata mona.

³ 'Me litšebeletso tsa mofuta ona, ha Molimo o ratile, ha li a lebisoa ho . . . E lebisitsoe ho Kereke, molemong oa Kereke, moo re utloang e hlokahala hakana nakong ena, hohle, le teng, ho joalo, molemong oa ho aha 'Mele oa Kreste. 'Me, joale sena, thutong. Ke bile le litšebeletso tsa pholiso lilemo tse robeli, ka kotloloho; 'me joale, ho ruta, e tla batla e le ntho e ncha.

⁴ 'Me ke ne ke nahana, thapama ena, ha ke phetla Bibele, ka mora ho ba maphathe motše share. Ke ile ka nahana, "Be, ke boleletse batho hore ke tla ruta ka *Mengoaha e Supileng ea Kereke*, mohlomong, ha Morena a ratile." Ha ke qala ke bala, 'me feela, ka hla ka thaba haholo, ha ke qala ho e bala. 'Me ka nahana, "Be, nka nka ntho eo eohle bosiu bo le bong, nakong ea hora."

⁵ Kahoo, ke ne ke sa tsebe seo Moea o Halalelang o ka batlang hore re se etse. Rona, ha re leke ho hlophisa letho. Empa e le feela, "Ha e le thato ea Hau, Morena," le a bona. Ke ntho e khabane ho fetisia eo. 'Me hape, ha e ka ba thato ea Morena, ke rata ho ruta bosiusing bona ka mengoaha ea kereke, 'me hosane bosiu holim'a *Letšoao La Sebata*, 'me bosiu bo latelang holim'a *Tiiso ea Molimo*, le hoo.

⁶ 'Me, ebe, Moqebelo. Khele, moena oa rona, mohlokomelei oa ntlu, o ne a ntse a mpolella, kajeno; o itse, "Ha ba ka e tšoara Moqebelo bosiu le Sontaha hoseng, ka tloaelo, ha baeti ba kena har'a rōna, khele, kereke e tla be e silafetse haholo, le joalo-joalo."

⁷ Kahoo ba entse tlhahiso ea Laboraro, Labone, Labohlano le Sontaha hoseng, Sontaha bosiu. 'Me ka re, "Be, hoo ho tla itokela ka ho phethahala, ho ea kamoo ke bonang."

⁸ Ka hona re tla leka, ha Morena a ratile, ho e tšoara Laboraro, Labone, Labohlano, Sontaha hoseng, le Sontaha bosiu. 'Me, mohlomong, Sontaha bosiu re ka tšoara tšebeletso ea kolobetso, ka ha batho ba ntse ba botsa ka ho kolobetsoa. 'Me ka hona joale...

⁹ 'Me re tla leka, bosiu bo bong le bo bong, ho qala ka nako, ka mashome a mararo ka morao ho supa. 'Me 'na, ke tla hloella kalana ka hora ea borobel, re tšoanetse re be re tsoile tabernakeleng ka mashome a mararo ka morao ho robong, ha Morena a ratile. E le hore le... Kea tseba hore le a sebetsa, 'me re hlompha seo.

¹⁰ 'Me joale Melaetsa ena e menyane e tsoang Bukeng ea Tšenolo e lebisitsoe ho Kereke. 'Me ekare bohole ba ka hopola sena, hore ha e a lebisoa borapeling ba mang, kapa ka sepheo sefe; empa e le feela, ka tsebo ea ka e khabane, ke ho bala le ho hhalosa Lentsoe la Molimo. Le a bona? Ha se ho susumetsa sepheo sefe sa boitšepo, kapa ha e a lebisoa ho motho mang, motho ofe ka bomong, kapa kereke ea mang, borapeli ba mang.

¹¹ 'Me lebaka leo ke ratang ho ruta ka tšenolo ena mona tabernakeleng, ka ha e le kereke ea ka, khele, ke ikutloa ke le lapeng. 'Me—'me ke mpa feela, le a tseba, ke fepa linku tsa ka lijo tseo ke li hopolang hore lia li hloka, le a tseba. Tse ling tse hole...

¹² Batho, nako tse ling ba tlameha hofafatsa letsoainyana ha—ha—ha lesere le batla le letse hlobo, le a tseba. Ha u sa etse joalo linku li ka lemala. Ka hona, hang ka nako, ha lesere le lala hlobo kerekeng, 'me—'me ho hlaho liphapang-nyana, ke hopola letsoaeana, la mofuta, le batla le hlahisa tatso, ha le nahane joalo? Le batla le ba thibela ho kula.

¹³ Joale re rapela hore—hore Molimo o tla re hlohonolofatsa maitekong a rona. 'Me ke ba ba kae...? Ke maikutlo feela, joaloka banna le basali, ba kang rona, ke rata ho shebana le taba eo, hosane bosiu, holim'a, "Letšoao la sebata ke'ng?" Lintho li ngata ka lona ka Bibeleng. "Ke mang ea nang le eona? 'Me ke mang ea tlang ho le fumana?"

¹⁴ 'Me hape, ntho e latelang, nako ea ntho eo e tla fihla. 'Me ha ke tsebe, e ka ba joale. Re tla sheba 'me re bone, yaa, hoo, ho tla ba le lihlopha tse peli feela tsa batho lefatšeng, 'me se seng se tla tšoauoa le liabolosi, 'me se seng e be letšoao la Molimo. 'Me ha ke nahana, haeba re atamela nako eo, re mpe re qale re qamake, ho fumana so ntho eo e leng sona, hoba e ke ke ea kena feela joaloka ntho eea tonana. Bibele e boletse hore le tla nyenyelepa habonolo, hona, "Ho ka thetsang le bona bakhethoa hola ke ntho e ka etsoang." Ka hona re tla leka, ha Molimo a ratile, ho sheba har'a eona, hosane bosiu. Joale, ke mono ke ho latela feela bokhabane ba ka...

¹⁵ Joale, tloo le Bibele ea hau, le pensele ea hau le pampiri, 'me u batla ho ngola Mangolo. 'Me, ha u hopola e sa nepahala hantle feela, ngolle lengoloana u le behele bosiu bo latelang.

¹⁶ Ke hopola ke lula selemo le likhoeli tse tšeletseng Bukeng ena ea Tšenolo, ka—ka tabernakeleng mona. Ke seo ke se ratang, ka—ka thuto. Ke rata ho ruta feela. Oh, khili! Ke—ke—ke—ke nahana hore e a babatseha bo-uena. E ala motheo, 'me e batalatsa kereke.

¹⁷ 'Me, therong, joale, batho ba teng bao e leng baboleli. Ba ka thonaka Lentsoe, ka tšusumetso, 'me ba Le tjbela kantle mono libakeng. Hoo ke ho nosetsa Lipeo tseo moruti a li rutileng. Le a bona? Joale, u lokela ho kenya Peo, pele, 'me u E nosetse. 'Me ho nosetsa ho tsoa therong ea Lentsoe.

¹⁸ Phapang e kholo e teng, e batsi lipakeng tsa moruti le 'moleli. Le a bona? Ke lineo tse peli tse fapaneng tsa Moea, ka botlalo, lineo tse peli tse fapaneng. 'Me ke bua sena ka boikokobetso, empa, ha ke na le e 'ngoe ea neo tseo.

¹⁹ Empa ea ka, ka tloaelo, ke ho rapella bakuli. Ke seo Morena a mpilelitseng ho se etsa. 'Me joale, nakong ena, ho khatholla kelello ea ka, ho ithuta ka ntho e fapaneng, e seng litšebeletso tsa pholiso ea Khalalelo; feela—feelaa ho ruta Lentsoe. 'Me, oh, mona re tsoella hantle haholo. Rona... Ke a hopola, le se le 'mameletse nako e telele, lilemo li ka ba leshome le metso e 'meli tikolohong ena, holim'a eona.

²⁰ 'Me ke ne ke tloaetse ho bua ka... Ha se motlae, empa, thuto e khohlighetse, ka re, "Joaloka motho ea lulang tafoleng a e-ja bohobe ba poone le linaoa." Joale, li molemo ho uena, empa e a u khathatsa, hang ka nako, u batla ho fumana ho hong ka thoko, lebejanapo le k'heiki, hang ka nako, ho leka-lekanya lijo. Empa lintho tse molemo tsa mehla-ea-khale li tla u khomarela hamonate, 'me, bonnyane, li u fa ntho e qalisang.

²¹ Joale, tabeng ena, ke tumelo ea ka e ikokobelitseng hore re phela matsatsing a koalang nalane ea lefatše. Ke batla ho hlakisa seo hantle. Joale, mohlomong ke fositse. Ha ke tsebe. Ha ho motho ea tsebang. Jesu o itse, "Esita le Mangeloi a Lehholimo a ke ke a tseba." O ne a sa tsebe, ka sebele sa Hae. O itse, "Ke ka Ntate feela, ke Eena feela Ea tsebang." Empa ke 'nete eibile e ometsoe hore O a khutla. 'Me ha ke bone letho le setseng haese feela ho khu... Ho khutla ha Morena.

²² Ka nako, ha sheba 'me ke talima, sechaba se pshatlehile. Ke bona lipolotiki li pshatlehile. Ke bona malapa a pshatlehile. Ke bona kereke e pshatlehile. Ke... Ha ho letho le sele le ka e lokisang, haese Molimo, ke phetho, hoba ha ba na letho le sele. Maitšoaro a sechaba a senyehile. 'Me mekhatlo ea lipolotiki e pshatlehile; athe re tšepile lipolotiki tsa rona haholo; li pshatlehile.

²³ 'Me thaka le leholo Engelane, nakoana e fetileng, le itse, "Che, demokrasi e ne e le—e ne e le diseile tsohle 'me ho se ankora." Ha thoe, "Ho tla fihla mohla ba emang likalaneng tsa maiketsetso, ba iketela likhetho." Che, ke 'nete. Empa o ne a sa nahane ka Ntlu Mahosana ea ha'bo e ratoang, kamoo e fetohileng liseile tsohle ho se ankora, le eona. Ea pheutsoe, le eona.

²⁴ 'Me 'muso o mong le o mong oa lefatše lena o tla kamoha. Jesu Kreste o tla busa a be a rene. Kahoo ho na le:

Tšepo tsa ka ha lia hahuoa holim'a letho
Haese Mali a Jesu le ho loka;

Tse likileng moea oa ka li a theleha,
Ke Eena tšepo ea ka eohle le tšiea.

Ke ema, holim'a Kreste, Lefika le tiileng;
Mobu 'ohle ke 'habathe le tebang.

²⁵ 'Me, oh, eka joale re ka be re qala tšebeletso ea thuto ea likhoeli tse tharo, le tle le kene Bukeng ea Tšenolo le ho e tlamahanya le Daniele, pono e kholo.

²⁶ Ho setse ba ba kae, mohlapeng mona, le hopolang mohla ke ne ng ke behile chate ea khale mona? Ke tseba Moena Head a ne a le teng, 'me re fumana ba 'maloa ba lona mona mohla ke neng ke behile chate ea khale.

²⁷ Joale, Buka ea Tšenolo, kamoo E raliloeng kateng. 'Me Daniele o tlamahna le Eona. Esaia o tlamahana le Eona. Testamente ea Khale eohle e tlamahana le Eona. 'Me Ke Buka ea Tšenolo ea Jesu Kreste. Le a bona? Buka ea Tšenolo ea Jesu Kreste.

²⁸ 'Me hape, ka hare ka mono, ho fumanoa Likereke tse Supileng, Likotlo tse Supileng, Litiiso tse Supileng, Literompeta tse Supileng. Joale, terompeta e emetse ntoa; tiiso, sephiri se—... ho phutholla; 'me kotsi e latela ntoa e 'ngoe le e 'ngoe.

²⁹ 'Me ka thuso ea Molimo, le ka buka ea nalane, nka le kholisa hore re phela ho Terompeta ea Bosupa, bakeng sa Kotsi ea Bosupa, le Tiiso ea Bosupa ho manolloa, le ho tšolloa ha Nkho ea Bosupa.

³⁰ Mohla ea botšeleta e utloahalang; re tla kena ho eona, mohlomong, ho tšoaea, ka Labohlano bosiu. Mehleng ea Ntoa ea Pele ea Lefatše, khele, e... Terompeta eo ea Botšeleta e utloahetse ka mokhoa oo, hantle ho latela nako eo Molimo o e boletseng ka eona. Hantle feela, ho ea ka thutafatše, ho latela tiiso pele ho moo. 'Me mohla sephiri se neng se senoloa ka mono, bakeng sa kolobetso ea Moea o Halalelang; 'me e—'me batho mohlang oo, kamoo kereke e sa kang ea tsamaea e nyoloha; 'me ba neng ba tsamaea ba hanne ho tsamaea Leseling, 'me ba khutlela morao. 'Me kotsi ea manolloa mehleng eo, 'me ea tšolleloa lefatšeng, eona e ne e le feberu, e bolaileng batho bohle kamoo e entseng, likete tse atisoang ka likete.

³¹ 'Me hape ho theohela mongoaheng ona oa ho qetela, moo re leng teng mona. 'Me le tle le mamele feela seo Morena a se bolelang ka eona, Lentsoeng la Hae. Joale, seo ha se boiqapelo ba ka. Ke tla be ke e bala joaloka koranta, hantle ho tsoa Lentsoeng la Molimo. Ka hona, Ena ke tšenolo ea Hae ho Kereke ka kotloloho, ho Kereke; Tšenolo ea Jesu Kreste, ho Kereke.

³² Joale, pele re bua le Eena, kapa re bua ka mongolo oa Hae, ha re inamiseng lihloho tsa rona 'me re bue le Eena nakoana ka lentsoe la thapelo.

³³ Ntata rona ea Leholimong ea mosa, re sa inamisetsa lihloho tsa rona leroleng re hlomohile, moo re ntšitsoeng teng 'me re tla khutlela teng ka tsatsi le leng, ha U ka lieha. Re inama ka boikokobetso, ho kopa hore U be haufi le rona, bosiung bona, ho re hloholonolofatsa. Nka phetla maqephe a Bibele ena, empa ha ho motho ea ka phetlang Buka kapa ho manolla litiiso tsa eona. 'Me ho ngotsoe Mona, "Ea tlosang Mona, ho tla tlosoa, kabelo ea hae, Bukeng ea Bophelo; 'me ea eketsang ho Eona, likotlo tsa Molimo li tla tšolleloa holim'a hae."

³⁴ Ntate, re a elelloa, joaloka banna le basali ba busoang ke lefu mona bosiung bona, ba tsebang hobane re batho ba habileng Bosafeleng. Molimo, Moea o Halalelang o ke o tle, Mongoli oa Bibele ena, 'me o re bulele maqephe ana. 'Me mohlanka oa Hau ea ikokobelitseng, ea se nang thuso a ke a rerele batho ba shoang joaloka motho ea shoang, eka hoja ena e tla ba tšebeletso ea ho qetela eo nkileng ka phela mose o koano oa Bosafeleng, bosiu ba ho qetela boo re ka phuthehang 'moho ka bona. 'Me setho ka seng sa phutheho bosiung bona eka hojane ena ke therero ea bona ea ho qetela eo ba tl Lang ho e utloa. Molimo, falatsa bosaoana bohle. Re tlatse ka botšepehi, ka ho tseba re tlameha ho arabela Kahlolong ea Molimo, ka tsatsi le leng. 'Me boitšoaro ba rona nqa ho Eena le Lentsoe la Oona, joale, a tla betla pheletso ea Bosafeleng ba rona.

³⁵ Ka baka leo, Ntate, ke ka lipelo tse thothomelang, re tl Lang ho Uena, le ho kopa. Ha Morena Jesu, ka sebopaho sa Moea o Halalelang, a nke Lentsoe la Molimo, bosiung bona, le ho Le neha pelo e 'ngoe le e 'ngoe, kamoo re hlokang. Hoba re e kopa ka Lebitso la Hae. Amen.

³⁶ Ke batla ke imakalletse, metsotsoana e 'maloa joale, ka ho leka ho phetla thuto eo re ka e rutang. Hobane, haesale e le mabapi le pholiso ea Khalalelo lilemong tse 'maloa tse fetileng, 'me hape, kapa, mohlang oo, e ne e se holim'a boporofeta, ho hang, e ntoo—e ntoo ba ho kena hantle moleng oa thapelo.

³⁷ Empa joale, bosiung bona, re batla ho haha motheo oa Buka eo re kopang Molimo ho re bulela eona, eona ke Buka ea Tšenolo ea Jesu Kreste.

³⁸ Buka ena e ngotsoe ka A.D. 96, ho latela bangoli, 'me e ne e le Johanne ea ratoang.

³⁹ 'Me o bone pono ena sehlekehlekeng sa Patmose, sehlekehlekeng se Leoatleng la Aegean, limaele tse ka bang leshome le metso e mehlano, kapa ho hong, mopotoloho oa sona, ho potoloha, sebaka se mafika se tletseng linoha, le lintho tse joalo, teng sechaba sa Roma se se sebelissa joaloka Alcatraz, joaloka ha re e fumana kajeno, nqalo ea botlamuo ba linokoane tseo 'muso o sitiloeng ho li laola.

⁴⁰ 'Me Buka ena e ngotsoe ke oa ho qetela ho baapostola ba Morena Jesu Kreste oa rona, ho lumeloa e le moratua ea neng a itsetlehile sefubeng sa Hae ka mor'a tsoho; 'me A re, "E ka ba eng ho lona ha a ka lula Ke be ke fihle?" Johanne o shoele, e le monna oa leqheku. E mong le e mong oa bashoelatumelo ba tiisitse bopaki ba bona ka mali a bona.

⁴¹ Johanne, qetello ea hae e mo fihletse tjena: O ile a tšoaroa, 'me a belisoa pitseng ea mafura lihora tse mashome a mabeli a metso e mene, ea mafura a chesang a belang, a sa hlaheloe ke bobe bofe. 'Me ba mo beha sehlekehlekeng, joalokaha ho lumeloa ka tloaelo, joaloka moloi, "O loile mafura hore a se ke a mo chesa," ba rialo. Ehlide, e ne e le matla a Molimo, ao. U ke ke oa belisa Moea o Halalelang mothong. Hobaneng! Ka hona ba leka ho O belisa ho eena, empa Molimo oa se ke oa e lumella. 'Me O ne a na le mosebetsi oo a lokelang ho o etsa. 'Me ho fihlela Molimo a qetile ka motho oa Hae, ha ho letho lefatšeng le ka mo tšoenyang. Ke phetho.

⁴² Joale, Johanne o ne a tsofetse, eena...ba bolelloa ke borahistori, hore o ile a tlisoa ho—ho kerekeng, ho rera. 'Me o ne a tsofetse haholo, ntho feela eo a neng a ka e bua, e ne e le, "Bana ba banyenyane, le ratane."

⁴³ Ke a le bolella, ke ntho e khabane eo haholo ho e rera. "Bana ba banyenyane, le ratane." Ha ke tsafala, tšebeletsong joale, 'me ea ka...ke batla ke le selemong sa ka sa bo mashome a mabeli a motso o mong. Ke nahana, ka nako tsohle ha ke ntse ke tsamaea, hore sena...Ha ke ntse ke nahana haholo ka Morena Jesu, ke qala ho fumana hore ke lerato le apesang ntho eohle. "Lerato la Molimo, le tšolletsoeng lipelong tsa rōna ke Moea o Halalelang."

⁴⁴ Joale re tla bala feela litemana tse 'maloa mona, ho ba...ho qala, 'me re tla kena hantle thutong ea kereke. Le ho leka ho e tlisa sebakeng, ha Molimo a ratile, nakong e kana eo ke nang le eona, ho e fihlisa moo re ka kenang ho nka, *Letšoao La Sebata*, bakeng sa hosane bosiu.

⁴⁵ Joale, taba ena e lebisitsoe ho kereke. Joale, ke tla leka ho nka, bonnyane, kereke ea Efese, kereke ea pele, le kereke ea ho qetela eo re phelang ho eona joale, kereke ea Laodisea joale.

Tšenolo ea Jesu Kreste, eo a e neiloeng ke Molimo, ho bontša bahlanka ba hae lintho tse tšoanetseng ho hlaha kapele; tseo a li rometseng ka lengeloi la hae a bileng a li

*tšoantsetsa . . . a li rometseng ka lengeloi la hae a bileng
a li tšoantsetsa Johanne, mohlanka oa hae:*

⁴⁶ Joale, mona Lengolo le re fa qalo. Ke, “Tšenolo . . .” Kapa, lentsoe tšenolo le bolela “ntho e senotsoeng.” “Tšenolo ea Jesu Kreste,” e neiloeng Johanne. ’Me lengeloi le ne le rometsoe ho paka, kapa ho e pakela.

*Le ea tiisitseng lentsoe la Molimo, a paka le tsa Jesu
Kreste, e leng ka tseo a li boneng.*

Ho lehlohonolo ea balang, . . .

⁴⁷ Ba bakae ba ka ratang ho fumana lehlohonolo? Ka hona, E bale. Le a bona, “ea balang.”

*Ho lehlohonolo ea balang, le ba utloang mlitaba
tsa boporofeta bona, ba bolokang tse ngoliloeng teng:
hobane nako e atametse.*

⁴⁸ Ka mantsoe a mang, nako e ne e se haufi *mohlang oo*, empa, “Nako e atametse, mohla ba bonang Lentsoe lena le phethoa, mohla Tšenolo e felletseng.”

⁴⁹ Mohla Molimo o neng o qala, joaloka setaki se takang setšoants̄o sa ntho e itseng, O qala a tlatsa likarolo tsa Hae. U ka qala oa bona se ipha sebopreho. ’Me ha u qala qalong ea Buka ea Tšenolo, u bona Jesu Kreste a qala a kena temeng. ’Me qetellong ea Eona, le ’Mona a feletse, a lutse le Kereke ea Hae, a tlotlisitsoe; matsatsi ’ohle a sebe le matšoenyeho le meleko a felile, ’me Kreste o lutse le Kereke ea Hae, Maholimong a maholo a holimo.

⁵⁰ Ho lokile, temana ea 4. Mamelang. “Johanne ho likereke . . .” Joale, enoa ke Johanne ea buang. Pele, e ne e le Molimo o tsebisang Tšenolo ea Jesu Kreste. Bobeling:

*Johanne ho . . . likereke tse Asia: Le ke le neoe mohau
le khots̄o, ke ea leng teng, ea neng a le teng, le ea tlang
ho tla; le ke Meea e supileng e pel’ a Molimo;*

⁵¹ Oh, hola re ka leketlisa letlapa mona joale, ho takā setšoants̄o, se seng se kae, le a bona, “Meea e supileng e pel’ a Molimo;”

⁵² Joale, ho boloka nakoana, le ho lumela hore ke . . . ho tseba nke ke ka qotsa letho ka phoso, le ho leka ho hang. ’Me ha le ka fihleloa ke pelaelonyana ka eona, le e ngole fatše ’me le mpotse, ’me ke tla le nea Lengolo la eona. ’Me joale re lokela ho potlaka ho kena tabeng ena, nako e re patisitse haholo.

⁵³ Joale, “Meea e supileng e pel’ a Molimo.” Meea ena e supileng e ne e bapisits̄oe joaloka Meea e supileng e tla romelloa Mengoaha e Supileng ea Kereke, “Meea e supileng pel’ a Molimo.” Re ka e thonaka ho tsoa ho Testamente ea Khale, le ho thonaka mono, holane feela re na le nako.

Le ke Jesu Kreste, paki e tšepehang, le letsibolo la tsoho ea bafu, le morena oa marena a lefatše. Ho ea re ratileng, ea re hlatsoitseng...

⁵⁴ Khele, shebang feela Johanne ha a fulueha, ha a ne a sheba. O qala feela a bua. O itse:

...ho ea re ratileng, ea re hlatsoitseng libe tsa rona maling a hae,

A ba a re bea marena le baprista ho Molimo... Ntatae; ho eena ho isoe khanya le matla kamehla le mehla. Amen.

⁵⁵ “A ba a re bea baprista le marena ho Molimo.” “Rona” ke bongata. E seng “o beile ‘na moprista le morena;” empa, “o re beile,” Kereke.

⁵⁶ Joale, o bua le likereke tsena tse supileng, hoba ke Mengoaha e Supileng ea Kereke.

⁵⁷ Joale, o itse, “Borena le khanya, li isoe ho Eena kamehla le mehla.”

⁵⁸ “O re beile baprista.” Na le tsebile hore moprista ke eng, phaposi ea hae ke efe? Moprista o lokela ho etsa sehlabelo, ho etsa poelano. ’Me koana ho Baheberu, E boletse hore rona, Kereke, ke marena le baprista, “Boprista ba borena, sechaba se halalelang, sechaba se ikhethileng.” Le a bona? “Sechaba se halalelang, batho ba ikhethang, baprista ba marena.” “Nyehelo,” ke ena joale: “ba hlasisang mahlabelo a moea,” monna e mong le e mong le mosali ea tlang ho Molimo o kena ka har’ a lesira.

⁵⁹ Testamente ea Khale, ho ne ho le... ho ne ho le lesira le leketlileng pakeng tsa sehalalelo le Sehalalelisiso. Ke Aarone feela, a le mong, ea neng a lokela ho kena mono, hang ka selemo. Empa monna e mong le e mong e kileng ea ba moprista, o ne a ka latsoa, kapa ho latsoa manna a pele ao Moshe le Aarone ba kileng ba a olla letsatsing la pele mohla manna a neng a theoha leholimong. Mohla ba neng ba tšela noka ea Jordane... .

⁶⁰ Lira tsa bolaoa, ka mor’ a tsona. ’Me letsatsi le hlahlamang ba tsoa, ’me hohle fatše, ho ne ho letse maphaketsana. Molimo oa theola pula leholimong. Ba e bitsitse “manna,” e latsoehang joaloka mahe a linotši. ’Me batho ba lokela ho olla a lekaneng ho ba tšoarella letsatsi leo le leng. Haeba ba ne ba e boloka, e ne e senyeha.

⁶¹ Eaba Molimo o bolella Moshe le Aarone hore ba tsoe ba bokelle liroto tse ngata tse tletseng homere, tse kholo, le ho a kenya ka har’ a... pel’ a areka, Sehalalelo.

⁶² ’Me mono, hore, nako le nako ka mora moloko oo, hore moloko o mong le o mong o latetseng oo, ha feela boprista boo ba Levi bo tsoeletse, kea kholoa, monna e mong le e mong ea neng a e-na le tokelo ea ho ba moprista, enereha a hlomamisoa ho ba moprista, a e-na le tokelo e phethahetseng ea mothamo

oa manna a mantlha. Nahanang ka eona. Ke tokelo e kakang eo banna bao ba neng ba nahana hore ba tla ba le eona, mohla monna a tsebileng hore o tla kena bopristeng! O ne a tla fumana e—e mothamo o tletseng o besitsoeng, o futsoetsoeng ka mohlolo, lijo tse mohlolo tse tsoileng ho Molimo leholimong, tse neng li bolokiloe ka mokhoa o ka holima hlolleho.

⁶³ Tšebeletso eohle ke e kaholim'a tlhaho. Batho ba ka bolela joang hore ke Bakreste, 'me ba latola matla a mohlolo? Ha ke tsebe hore ba e etsa joang, ka bonna. Shebang. Empa, matla a mohlolo! O ile a koenya ntho e mohlolo, hang feela hoba e be moprista.

⁶⁴ Ke papiso e ntle hakakang joale, ea motho e mong le e mong... Matsatsing ao, ba ne ba loketse ho tsoalloa lelokong le itseng, Molevi, pele e eba moprista, empa joale ke "mang kapa mang ea ratang, a tle." Le a bona? 'Me hang ha ba fihla, leha ho le joalo, ba tlamehile... Tsoalo e a kenyelatsoa, le eona hape. "Eka khona le tsoaloe labobeli." 'Me monna e mong le e mong kapa mosali ea tsoetsoeng labobeli, ka Moea oa Molimo, o na le tokelo (kajeno), ea manna. Manna ana ke Moea o Halalelang.

⁶⁵ Mohla Petrose... ka mor'a hoba ba tsoe pherekonong e kholo, 'me bokoala bo tlohile ho bona, 'me Morena o ne a ba hlohonolofatsa, 'me Moea o Halalelang oa theoha ka Letsatsi la Pentekosta. Ba tsoela seterateng 'me ba qala ba hoeletsa, 'me ba itšoere joaloka mahlanya, ho fihlela batho bohle ba hopola hobane ba tahiloe. "Helang, kea ipotsa hore na re tla etsa joang ka seo?" E mong le e mong oa ba-... Ka hona esita le lefatše la bolumeli, mohlang oo, le hopotsa batho bao ba tahiloe.

⁶⁶ 'Me mamela, motsoalle oa ka oa Mokatolike, moroetsana ea lehlohonolo Maria o ne a ena le bona. 'Me haeba ne a ke ke a kena Leholimong ho fihlela a nyolohetse mono 'me a latsoa Ntho e 'ngoe seo se ile sa etsa hore a itšoare joaloka mosali ea tahiloeng, u tla fihla joang mono ka ntho e katlasana ho feta eo? Empa o ile a amohela Ntho e 'ngoe. "Ba lekholo le nang le mashome a mabeli, ba ena le basali, Maria Magdalena le bao," 'me ba tsoela seterateng, ba itšoere joaloka batho ba tahiloeng, ba thekesela.

⁶⁷ Ho fihlela ruri (Haeba le ka tšoarela polelo eo.), kereke e rarahaneng ea letsatsi leo e itse, "Ba shebeng! Seo se bontša seo ba leng sona. Bohle ba khotše veine e ncha."

⁶⁸ Ke seo E neng e le sona. Joale mamelang, Peterose o itse (Eaba ba qala ba re...), a re, "Lona banna ba Jerusalema, lona ba ahileng Judea, le tsebe ke hona, 'me le mamele mantsoe a ka: Batho bana ha ba taho." Joale, ke bua ka kereke ea Efese mona, joale. Le a bona? Le a bona? Ho lokile, mongoaha oa kereke ea pele. A re, "Batho bana ha ba taho, joaloka ha le lekanya. Etsoe esale hora ea boraro ea letsatsi; li-saloon ha li eso buloe. Joang...? Be, ena ke hora ea boraro ea letsatsi." A re, "Empa sena ke sane se boletsoeng ke moporofeta Joele. Se ngotsoe ka

Bibeleng ea lona. Ka Bibeleng ea lona, sena se ngoliloe, hore ntho ena e tla etsahala. Khele,” a re, hoo, “le loketse le be le tsebile taba ena, lona mesuoe.”

⁶⁹ Be, na ho ka etsahala, joaloka—joaloka ha kereke e ne e kentsoe tlas'a ponahatso eo, 'me ponahatso e tšoanang e tšepisitsoe matsatsi a ho qetela, na le ke ke la supa morao le ho re, “Sena ke se neng se boleloe?” Le a bona? Ke moo. 'Me lefatše le kantle ha le tsebe letho ka eona; ke—ke bothoto ho bona. Joale ba itse . . .

⁷⁰ A re, “Shebang mona.”

'Me ba re, “Joale . . .” eitseha ba utloa taba ena.

A ba borella kamoo ba thakhisitseng Jesu kateng. 'Me ka nako tsohle . . .

⁷¹ U ka tšoarelo ho thakhisa Jesu. U ka fumana tšoarelo ho tlaela ka Lebitso la Hae. “Empa ea buang khahlano le Moea o Halalelang, a ke ke a tšoareloa, lefatšeng lena, kapa lefatšeng le tlang.” Re matsatsing a ho qetela, ka hona hlokromelang. Tsamaeang ka boikokobetso. Moea oa hau o hlabehe, u robehe; pelo e ikokobetse, le ho rata ho lumella Moea o Halalelang ho u etella pele. Amen. Ho lokile. Oh, khili!

⁷² Ke bana moo ba leng teng, bohole ba ka holimo mono, ke batho ba itšoereng feela . . . E ne e le makoala, lihora tse 'maloa pele ho moo; ba ikoletsoe phaposing e ka holimo. Empa eitseha Moea o Halalelang o theohela holima bona 'me o tlatsa lipelo tsa bona, kantle literateng! Kea kholoa ba ne ba . . . Ba ne ba sa etse lintho tse fosahetseng. Ba ne ba le kantle mono ba thabile 'me ba rorisa Molimo, ho fihlela—ho fihlela ponahatso e le kaalo. Ba ne ba sa tsoela kantle mono ba ngangisana joale, hore e ne e le Methodise kapa Baptise, e ne e le bona, kapa hore e ne e le Bafarisi kapa Basadusi. Ba ne ba le kantle mono ba thabile hobane ba ne ba latsoitse Leholimo moeeng oa bona. Molimo o ne a ba file manna a moea.

⁷³ Joale, joaloka ha Molimo o theotse manna mono ka tlhaho, 'me a tšoarella mehleng eohle ea leeto la bona; papiso e ntle. 'Me ka letsatsi leo ba keneng lefatšeng la pallo, manna a khaotsa.

'Me ka Letsatsi la Pentekosta, ntho eona eo . . .

⁷⁴ Shebang Pentekosta, ho Moshe. Ba ile ba hetla morao 'me ba bona sera se shoele. Miriama a phamola moropa, a qala a o otla, le ho hoeletsa, le ho hobela, 'me a matha a theosa le lebopo. Basali ba mo latela, ka ho tšoana. Eaba Moshe o phahamisa matsoho a hae, 'me a bina ka Moea.

⁷⁵ Ka Pentekosta, basali ba tsoa, ba thekesela, 'me ba tlolaka, ba hobela, ba itšoere joalo. Petrose a ema hara bona, a re, “Lona banna ba Judea, le lona ba ahileng Jerusalema, a taba ena e tsejoe ke lona, 'me le mamele mantsoe a ka: Hobane batho bana ha ba tahoa, joaloka ha le lekanya, etsoe esale hora ea boraro

ea letsatsi. Ena ke taba eane e boletsoeng ke moporofeta Joele; ‘Mehleng ea bofèlo, ho bolela Molimo, Ke tla tšela nama eohle ka Moea oa Ka: bara ba lona le barali ba lona ba tla porofeta: holima bahlanka ba Ka ba batona le makhabunyane a Ka Ke tla tšela Moea oa Ka; ’me ba tla porofeta: Ke tla etsa mehlolo holimo maholimong, le tlase lefatšeng; litšiea tsa mollo, le mouoane, le mosi: Ka mora tseo, ho eso tle letsatsi la Morena le leholo le tšabehang, e mong le e mong ea tla rapela Lebitso la Morena o tla bolokeha.” A tsoella joalo le joalo, a ntse a rera.

⁷⁶ ‘Me ha ba utloa hoo, ba mamela. Ho re, “Shebang thaka leo! Thuto ee o e fumane hokae?” Ba bang ba bona ba re, “Ha a khone le ho ngola lebitso la hae.” Bibebe e boletse, “E ne e le motho ea sa balang le ea sa rutehang. O tsoa sekolong sefe? Ha se yo. Joale, ebe taba ee e etsahetse joang le ka mohla? See se etsahetse joang le ka mohla?” Ba lemoha, ba re, “Be, helang, monna eo o hlile o qotsa Lengolo. ’Me ha re eso Le utloe joalo pele.” Le a bona?

⁷⁷ A re, “Bakang, e mong le e mong oa lona, ’me le kolobetsoe ka Lebitso la Jesu Kreste tšoareleng ea libe tsa lona, ’me le tla amohela Moea o Halalelang. Hobane pallo e etselitsoe lona, bana ba lona, ba leng hole, le bohole bao Morena Molimo oa rona a tlang ho ba bitsa.” Ka mantsoe a mang, “Lehlohonolo lena la manna a tšolohileng mona, joaloka ha manna a entse morao mono, le tla ba joalo molokong ona, moloko o latelang, moloko o latelang, ho ea fihla Jeffersonville, Indiana, le ho fihla lipheletsong tsa lefatše.”

⁷⁸ ‘Me ’ona Moea o Halalelang o tšolohileng mohlang oo, o a tšoloha joale; liphetho tse tšoanang, ntho e tšoanang, batho ba tšoanang. Le bona seo ke se bolelang? E phethahetse feela!

⁷⁹ Hlokomela, “Ke tla mo fa; ea hlolang, Ke tla mo fa Bohobe ba Bophelo.” O boletse seo ho e ’ngoe ea likereke. “Me ha a sa tla hlola a nyoroa, ’me ha a sa tla lapa. Ha a sa tla hlola a nyoroa.” Hang ha motho a kile (Ke ena; qhaoelang baki ka thata.), ha monna kapa mosali a ka amohela Moea o Halalelang hang ka ’nete, ha u sa tla mo sisinya le ka mohla. O tseba moo a leng teng. U ka tla ka li-isms le tsohle. O tla li phunyeletsa hantle. “Ha a sa tla hlola a nyoroa.” O tseba hantle feela hore Moetsi oa hae ke Mang; le ka mohla ha a ferekane. Ha e mo khathatse; o tsoela pele hantle.

⁸⁰ “Ke tla mo fa Bohobe ba Bophelo, ’me ha a sa tla lapa, ’me ha a sa tla hlola a nyoroa.” Le a bona? “Me Sefate se bohareng ba paradise ea Molimo, ’me o tla ja tsa sona, le a bona, Sefate.” Etsoe, Sefate e ne e le Kreste Jesu. Le a bona? ’Me Kreste Jesu, o shoele ’me o khutla ka sebopeho sa Moea o Halalelang, ka hona O teng mona, le manna a jeoang ka hara Kereke.

Hlokomelang, bonang, eo, temana ea 6.

’Me o re entse baprista le marena ho Molimo . . .

⁸¹ “Boprista ba moea; sechaba sa borena; nyehelo ea moea.” Ke eng hona joale? “Mahlabelo a moea, ke ho re,” ho qotsa Lengolo, “ke hore, litholoana tsa melomo ea rona e rorisang Lebitso la Hae.” Joale, eng ea mofuta ofe? “Sehlabelo sa moea.”

⁸² Joale, joale re ka mpa ra qala hantle mona; hlokamelang, sebaka se setle sa ho qala.

⁸³ Ha pherekano e kena kerekeng, ha u mathele ka thoko u tomola molomo joale. Haeba u le joalo, ruri ha u moprista. Le a bona, u mpe u rapelisise ka botlalo. “Sehlabelo sa moea, litholoana tsa melomo ea rona e rorisang Lebitso la Hae.” Na le bona seo ke se bolelang?

⁸⁴ “Be,” u re, “ha ke ikutloe ke batla ho ea kerekeng.” Empa u moprista. Ke tšoanelo ea hau. U tlameha ho ba teng mono.

⁸⁵ “Be, ha ke ikutloe ho nka kabelo tšebeletsong.” U moprista, “ea hlahisang sehlabelo, sehlabelo sa moea.” Ha se ho apolela motho ntho e itseng, kamoo ba e bitsang kajeno; ke hantle feela, ha ke na letho khahlano le eona. Ha se ho ea lata motho ea tlang kerekeng; ke hantle feela, ha ke na letho khahlano le eona. Empa, ke uena, uena ea hlahisang sehlabelo sa moea, “litholoana tsa melomo ea hau e rorisang Lebitso la Hae.”

⁸⁶ Ha le bona ho fihla mohla bohole ba nyefolang ba bua lintho tsena, le ho etsa lintho tse phoso, u etsang, na u a ikela? U tlameha ho ema mono ka sehlabelo sa moea, ho re, “‘Mali a Jesu Kreste a hloekisa sebe sohle,’ a nketsa sebopuoa se secha ho Kreste Jesu.”

“U mothaka, oa lehlanya!”

⁸⁷ “Ho ea ka seo u se bolelang. E lokile. Empa, ho ’na, ‘Ke matla a Molimo a isang pholohong.’ Ke a E lumela.” Le a bona?

⁸⁸ Joale, ba re, “U lumela pholisong ea Khalalelo?”

“Oh, uh, ha ke tsebe, molemo ekaba ho botsa molisa oa rona.”

⁸⁹ U nahana’ng ka eona? U moprista joale. U monna eo. Ho re, “E, monghali. Ke a E lumela, hoba Lentsoe la Molimo le re E joalo.”

“U lumela kolobetso ea Moea o Halalelang?”

“E, monghali.”

“U tseba joang?”

“Ke O amohetse.” Ehlide bo. Lehlohonolo la moea! Moea o Halalelang o theohetseng holim’ a baapostola, ’ona Moea o Halalelang o theohang joale.

⁹⁰ U re, “O baletsoe baapostola feela.” Re tla lokisa taba eo nakoaneng, ho bona haeba e ne e le eona kapa che.

⁹¹ Ho lokile, “Boprista ba moea, bo hlahisang mahlabelo a moea.”

Joale, temana ea 8, kapa, ea 7.

Bonang, o tla ka maru; . . .

⁹² Joale, e reng ke khefutse mona nakoana feela. “Maru,” ha e bolele A tla tla ka sealuma se seholo joalokaha ‘Mè, ho bokoe pelo ea hae, o lutse kae-kae mona.

⁹³ Enere ke sa le moshanyana, o ne a lula ‘me a mpolella, ho re, “O a tla. Lerus le leholo le tla hlaha ka letsatsi le leng, ‘me Molimo o tla tla.”

⁹⁴ ‘Me, joale, *leru* leo A kenang ka lona (Holane re na le nako feela ho khutlisa sena sohle, le ho fumana motheo oa ‘nete oa ntho eo kaofela.), joale, *leru* leo A tlang ka lona, ha se *leru* le kang la sealuma, empa, ke “*leru la khanya*,” O a kena. Le a bona? Le a bona?

⁹⁵ Joale, mohla Jesu a neng a khurumetsoa ke Molimo, holim'a Thaba ea Phetoho, “maru a Mo khurumelitse le seaparo sa Hae.” Le a bona?

⁹⁶ ‘Me mohla Elia a neng a theoha, *leru* le theohile ‘me la mo nkela holimo. Ha se—ha se Topallo ea Mollo, ha se . . . Ke bolela, ha se sealuma, empa, “*leru la khanya*.”

⁹⁷ Boteng ba Hae bo boholo, bo khanyang bo tla otla lefatše. “O tla ka maru.” Oh, ke rata seo. “Maru,” ho tla ba le leqhubu kamora leqhubu, la khanya ea Hae, le tla haola lefatšeng, ‘me tsoho ea bahalaleli e tla fihla. Mohla Moea o Halalelang oo o bokoang o phetseng lipelong tsa bona, ‘me ba shoele, setopo sa bona se robetse mono, ‘me mefopholi ea likhapha marameng a bona, le lintho tse joalo, ‘me ba beiloe ka ntle mona mabitleng. Leqhubu le leholo la Moea ona oo, le hoo “whoossh,” leqhubu ka mora leqhubu.

⁹⁸ “Oa morao e tla ba oa pele, ‘me oa pele e tla ba oa morao.” Ho ka ba joalo joang? Ke eona tatelano ea tsoho. Nke ke ka tseba motho molokong o nketileng pele, kapa moloko o tlang ho ntatela. Ke tla tseba bao ba molokong *ona*. ‘Me moloko o mong le o mong o tla hlaha, ka katileho, hantle ha o ne o theoha. “Ba morao e tla ba ba pele.” Ehlide, ho loketse joalo. Le a bona? Ke tla tseba batho ba heso. Thaka le latelang, ntate, o tla tseba batho ba habo; ntate-moholooa hae, batho ba hae; ho theosa joalo.

⁹⁹ Leqhubu kamora leqhubu, kamora leqhubu, kamora leqhubu, le bahalaleli ba tsoang hohle. Na hoo ho ke ke ha babatseha? Amen. Seo se nchafata maqheku hape. E. Joale hlokomelang hantle. Ho lokile.

... tla ka—tla ka *marung*; ‘me *mahlo* ‘ohle a tla ‘mona, (Ho sa tsotelehe ba shoele motšeо hakae, ba tla Mo bona.) *le bona ba mo hlabileng*: ‘me *meloko eohle ea lefatše e tla bokolla ka baka la hae*. *Leha ho le joalo, Amen.*

¹⁰⁰ Johanne a tlameha ho hooa feela, “Amen.” Hoo ke, “Ho be joalo. A ho be joalo.”

Ke 'na Alfa le Omega, . . .

¹⁰¹ Joale, *Alfa* ke “A” ka alfabeta ea Segerike. *Omega* ke “Z” ka alfabeta ea Segerike. Joale, ka mantsoe a mang, ha e ka fetoleloa kajeno, “Ke A ho ea ho Z.” Joale, e mong hape ea teng ke mang? “Ke 'Na Pele; Ke 'Na Oa ho Qetela. Ke tloha ho A ho ea ho Z.”

¹⁰² Holane e na le nako ho kena BoMolimong ba Kreste, hona joale, e ka ba taba e loketseng haholo nakong ena, BoMolimo.

¹⁰³ Ka hona, mehleng eo batho ba bangata ba lekang ho Mo etsa moruti feela, mofilosofe feela, kapa moporofeta feela. E ne e le Molimo. E ne e le Molimo kapa mothetsi e moholo ka ho fetisisa eo lefatše le kileng la ba le eena. Haeba E ne e le moporofeta, mali a hae e ne e le motho. Haeba E ne e le—e le mosuoe, morupelli, mali a hae e ne e le monna.

¹⁰⁴ E ne e le Molimo, 'me Mali a Hae e ne e le a Khethehileng. Molimo o Matlaohle o ile oa khurumetsa moroetsana Maria le ho bopa sele ea Mali ka popelong ea hae e hlahisitseng Mora, Kreste Jesu. 'Me Molimo oa theoha oa phela 'meleng oo, Molimo (Emmanuele), oa etsoa nama hara rona; ho tlosa libe.

¹⁰⁵ Mohla Molimo o ne o a etsa motho oa Oona oa pele, O mo entse ka setšoantšo sa Oona ka Sebele, e ne e le motho oa moea, ho Genese 1:26. Ho lokile. Ho ne ho se motho ea lemang mobu, hoba O etse motho, e motona le e motšehali. Re tla kena tabeng eo, kamora nakoana, holim'a tseo “linaleli tse supileng.” Empa feela . . . Empa O mo entse e le e motona le e motšehali, morao koana tšimolohong, ke hantle, “ka setšoantšo sa Oona ka Sebele.” 'Me Molimo ke Moea.

¹⁰⁶ 'Me hape, Genese 2, ho ne ho se motho ea lemang mobu, ka hona Molimo oa mo bea nameng; oa etsa motho, eseng ka setšoantšo sa Oona, empa ka lerole la lefatše (Ke hantle.), oa mo etsetsa letsoho le kang la tšoene, le leoto le kang la bere, kapa eng feela; ha ke tsebe, empa O mo file likutlo tse hlano ho hokana le lehiae la hae la lefatše. 'Me eaba motho eo o etsa sebe.

¹⁰⁷ 'Me Molimo oa theoha 'me oa etsoa motho, ho tlosa sebe sa motho (Amen.), ho lopolla.

Ke 'na Alfa le Omega, . . .

¹⁰⁸ Ke ile ka Mo sheba ka mona ho Tšenolo khaolong ea 4. Eitse ha Johanne a reteleha ho bona Lentsoe lena hape, se neng se bua le eena, “O ne a lutse Teroneng, 'me mookoli o le holim'a hlooho ea Hae.” 'Me mookoli o mebala e supileng e phethahetseng, 'me mebala ena e supileng e phethahetseng e ne e emetse Mengoaha e Supileng ea Kereke. Ho lokile, hape. 'Me e ne e le eng? Ke ena. Moena, taba ena e ncha. Shebang, mebala e supileng e phethahetseng, supa, 'me mookoli o emetse selekane.

¹⁰⁹ Molimo o file Nohe mookoli, pele, e le selekane. 'Me lielemente tseo li sa le lefatšeng, joaloka ha Molimo o tšepisitse pele, 'me pula e a na, 'me O bona seqha. A re, "Ha Ke sa tla le senya ka metsi hape."

¹¹⁰ 'Me eaba o talima Jesu, a le mebala e supileng ea mookoli ka holim'a Hae; O ne a le ka ho sena, e ne e le selekane sa Molimo. 'Me O ne a eme mahareng, Likandelare tse Supileng tsa Gauta. "'Me ho talingoeng A le joaloka lejoe la jaspere le sardone." Jaspere e ne e le Rubene, lejoe la sardone e ne e le Benjamine; e ne e le oa pele le oa ho qetela ho bapatriareka. Seo "Alfa le Omega, Qalo le Qetello," le mebala e supileng ea mookoli, Mengoaha e Supileng ea Kereke, selekane le Eena, ka Likandelare tse Supileng tsa Gauta, le linaleli tse supileng. Oh, ke setšoantšo se se kakang, ha re ka se finyella kamora nakoana, mohlomong, ha Morena a ratile. Ho lokile.

...*Alfa le Omega, qalo le qetello, ho bolela
Morena, ...ea neng a le teng, le ea tlang ho tla, ea
Matlaohle.*

¹¹¹ Ooh! Ke Mang? Tšenolo ena ke ea eng? Jesu Kreste. 'Me, mona, Eena ha se moporofeta. Ke enoa, Ke ea Matlaohle, Molimo o bonahalitsoeng; Alfa, Omega. "Ke tloha ho A ho ea ho Z. Ke Ea Neng A Leng Teng, Ea Leng Teng, le Ea Tlang Ho Tla. Ke Ea Matlaohle." E hlakile hantle, ha e joalo? Ha ho monyetla oa khang mono. "Morena, Ea Neng A Le Teng, Ea Leng Teng, le Ea Tlang Ho Tla, Ea Matlaohle."

¹¹² Joale Johanne o a bua. Mamelang.

'Na Johanne, ke leng ngoanabo lona, ea abetsoeng le
lona mohau mahlomoleng, le 'musong eona mamello
ea Jesu Kreste, ke ne ke le sehlekehlekeng se bitsoang
Patmose, ka baka la lentsoe la Molimo, . . .

¹¹³ Helang, na le ka nahana monna ea beoang sebakeng se kang seo, ka lebaka la Lentsoe la Molimo? E.

...*ka lebaka la lentsoe la Molimo, le . . . bopaki ba Jesu
Kreste.*

¹¹⁴ A lelerisoa kantle moo ka lebaka la ho bolella batho ba balumeli Lentsoe. Ke seo Lentsoe le se bolelang. Na ha e joalo? A le kantle mono ho rera; a lelerisitsoe, a khaotsoe kerekeng, sechabeng, lefatšeng lohle. Amen. Empa a sa khaoloa ho Eo Ea mo ratileng ea mo hlatsoitseng Maling a Hae ka Sebele. Boteng ba Hae bo ne bo le ho eena, sehlekehlekeng se bitsoang Patmose, "ka lebaka la Lentsoe la Molimo."

¹¹⁵ Kea ipotsa hore ke bareri ba bakae kajeno ba ka eang? Ho theoha ebile ha ho etsahala nthoana—nthoana, rea halefa, e re tšoonya haholo. Athe monna enoa mona o ne a belisitsoe oling lihora tse mashome a mabeli a metso e mene, 'me a lahleloa

kantle sehlekehlekeng sa Patmose, 'me Morena a ntse a e-na le eena.

¹¹⁶ Ke rata sefela sa khale seo ba neng ba se bina, "Ha Jesu a ea 'na, nka ea kae le kae." Rea se bina, empa kea ipotsa hore na re hlile re tiile ka eona. Ho ea ka maikutlo a ka a tsepahalang, ho ke ke ha ea halelele u tla fuoa monyetla oa ho e paka, kahoo molemo ke ho etsa bonnete ruri. Lekola, itlhahlobe, sheba hore tsohle li lokile na.

¹¹⁷ Joale, feela joang, ke sa tsoa qala mona joale. Johanne o a araba, 'me boletse a ne a le "sehlekehlekeng sa Patmose, ka lebaka la Lentsoe la Molimo, le bopaki."

Ka nkao ke Moea . . . (Ke rata seo.)

Ka nkao ke Moea ka letsatsi la Morena, . . .

¹¹⁸ Ho boleloa letsatsi le leng, joale; ho metsoalle ea ka ea Sabbathatha, etsoe ruri re tla kena ho eona, ka mora nakoana. Ho lokile.

*. . . nkao ke Moea ka letsatsi la Morena, ho haptjoa ke
Moea, 'me ka utloa lentsoe le leholo ka mora ka, . . . la
terompeta,*

¹¹⁹ Re mpe re se tlohele lipapiso tsena joale. Re etsa motheo joale, re tle re tsebe seo re buang ka sona ha ke fihla ka mona. Na le bona seo re tlang ho bua ka sona, "Ke Mang? Mothaka enoa ke'ng? Tšenolo ea Jesu Kreste ke Eng? Ke Mang, le hona? E tlile joang? Ebe E bolela'ng ho 'na?" Ho bona haeba E bolela letho ho lona, le a bona. "Ho bona se etsahalang mono, ho 'na." Hlokomelang.

Ka nkao ke Moea . . .

¹²⁰ Ho sa tsotellehe o halalela hakakang, o morapeli hakakang, u moreri hakae kapa setho sa kereke, sohle seo u ka bang sona, u ke ke oa khatha tema le Molimo ho fihlela o kena Moeeng. Ke hantle. Ha ke bolele ho haptjoa ke maikutlo. Ke bolela ho haptjoa ke Moea. Le a bona? Le a bona? Le a bona, o haptjoa ke maikutlo, ho etsa eng le eng. Empa ha u haptjoa ke Moea, u bona lintho. Ke hantle.

¹²¹ Kea kholoa Elia oa mehleng, moprofeta oa khale, tlase mono tsatsing leo mohla—mohla e . . . mohla mora oa Akabe, bao, ba neng ba hlabilo selekane le ba sa lumeleng, 'me—'me Josafate a imatahantse le bona. 'Me ba tsoa ba kena lefeelleng matsatsi a supileng, 'me ba sa ba nka tšupa-khutlo. Matsatsi a supileng feela, ho lekaneng feela ho ba hlokomela matsatsi a supileng; ba sa ka ba botsa Morena; ho tsoa feela, leha ho le joalo.

¹²² Na batho ha ba joalo feela? "Oh, ke tla u bolella, mosebetsi oo o betere. Ke tla tlohela kereke *ena* feela 'me ke fetele ho *eane*." Joale, u mpe u botse Morena ka taba eo, ho fumana seo e leng sona.

¹²³ Ho tsoela kantle mono le ho fumana ba kene khathatsong. Phepelo ea metsi ea khaoha. Ke bona bothata ba likereke kajeno, ho likoloha hohle ho etsa lintho tse ngata ho sa botsoe Morena ka tsona, 'me phepelo ea lona e ntse e khaoloa. Ua ipotsa hobaneng hobaneng u sa fumane mahlohonolo se sa mehleng, le matla a Molimo a sebetsang har'a lona, mohlomong mochoporo oa phepelo o khaotsoe. Lea tseba, ha u felloa, metsi . . .

¹²⁴ Ke kena lehoatateng ka nako e 'ngoe, kantle mono Arizona. 'Me ke lemoha sehlahlala se seng le se seng sa khale se lehoatateng leo se le kotsi; se tla u khomarela. Nako le nako ha u se thula, se tla u hlaba. Hobane ha se a fumana metsi a lekaneng ho se hlokomela, meutloa e etselitsoe tshireletso.

¹²⁵ Ha u khutlela mona, kapa holimo Oregon kapa kae-kae moo pula e nang ka linako tsohle, 'me sehlahlala sona sa mofuta oo ha se a mela litsenene ho tsona. Le a bona, ke metsi a li nolofatsang.

¹²⁶ 'Me ke bona bothata ka kereke. Ka nako ha u omella 'me u bofiloe, le ntho e 'ngoe le e 'ngoe, u hatsela hakaale u a hoama 'me u ba monyemo hona, ha u fumane lehlohonolo lefe la moea, ke moo pelo ea hau e tlalang e phophoma khalefo le bohale, 'me, motho e mong le e mong, "Oh, ke tla iphetetsa ho tona. Ke tla iphetetsa ho tšali. Ke tla tlohela kereke." Ke sehlopha feela sa litšeħlo tse phelang lehoatateng. Ke hantle. Seo u se hlokang ke Metsi a Moea o Halalelang a mehla-ea-khale ho tšeloa holim'a hau, ho nolofatsa pelo eo ea khale e thata. Amen.

¹²⁷ Ha ke—ha ke leke ho etsa metlae. Ke leka ho le tlisetsa taba ena. Moena, u tla fumana, haeba u nka letšoao la sebata, moo u tla beng u eme teng. 'Me ha u na thuso ka botlalo ha u na tšepo ha u e etsa. Ha ho tšoarello bakeng sa eona. Le ka mohla u ke ke ua tsoa ho eona. Ke hantle. U ka e etsa ka ho panya ha leihlo la hau, mohlomong, u a bona, kahoo hlokomela. Joale ke ena. O tla fuoa . . . Lemohang, lehoatata . . .

¹²⁸ Ke itse, e—e metsi, kamoo metsi a babaletseng a le bonolo. Ke seo re se etsang kajeno, ho kena Moeeng. Johanne o itse, "Ke ne ke le Moeeng."

¹²⁹ Mohla Elia a neng a le kantle lehoatateng, ba ile ba theoha. Josafate a re, "Ha re theoheng re botse moporofeta." Ba theohela ka pel'a moporofeta.

¹³⁰ Be, joale, o ile a pheula khalefo ea hae e lokileng. A sheba thaka leo, 'me a re, "Hobane'ng u sa ea molimong oa 'mao? Hobane'ng u sa khutlele kerekeng ea heno, ea khale, e batang, e tsitsipaneng? Hobane'ng u tlie ho 'na, mohla u keneng mathateng?" E ne e se ntho e ntle haholo ho e bua, empa boholo ba polelo eo bo lekane ho lekanya seo. "Hobane'ng u theohetse ho 'na? Hobane'ng u sa ee ho molimo oa 'mao? Bohle le tšoere likereke tseo tse kholo tse khabane, le baprista bao bohle ba fepehilegg hamonatjana, le joalo-joalo, motšeо mono. Khutlela morao 'me u ba botse ka eona. Hobane'ng u theohela mona

ho 'na?" Shuu. Khele. A hla a tlallana ka botlalo, ehlile bo, na ha a etsa joalo? A re, "Hola ke sa hlomphe sefahleho sa monna eo oa morapeli, Josafate, nka be ke sa u shebe." Oh, khili, moporofeta eo o ne a kene maemong a makakang. Joale o kene sekhoqetsaneng sa mofuta oo.

¹³¹ A re, "Che, laetsa moletsi ho 'na." Batho ba bang ha ba lumele 'mino ka kerekeng. Empa a re, "Ntlisetse moletsi." 'Me sebini se qala se letsatse sefela se monate sa khale, *Haufi, Le Molimo Oa Ka, Haufi Le Uena*; le ka se bitsa seo le se batlang, ha ke tsebe. Eitseha moletsi a qala a rapela, Moea ea Molimo oa theohela holim'a moporofeta. 'Me eitseha Moea o theohela holim'a hae, a haptjoa ponong; a qala a bona lintho.

¹³² U lokela ho fumana Moea oa Molimo. Kapa, u re, "Ha ke utloisise kamoo batho ba ka reng, 'Amen.'" Kena Moeeng hang. Ke hantle.

¹³³ Ha ke bone kamoo ba ka emang papaling ea beisebolo 'me ba tobolana mokokotlong, ba hlabatse ba tjolietsa, ba rola likatiba ba itšoere joalo. E bonahala e le bohlanya, ho 'na. "Be," u re, "ha u motšehtesi ea sefutho oa beisebolo." Ke batla ke le . . .

¹³⁴ Ho ka thoe'ng ka uena, joaloka Mokreste? Ho lokile. Ke hantle. U tlameha ho kena Moeeng oa eona.

¹³⁵ Ho joaloka mehleng mohla u neng u tsamaea metjeko. Ha ke kholoe u ka ea joale. Ruri lekhale. Empa haeba u—u ne u e tsamaea, ba ne ba tlameha ho letsatse 'mino oa hoop-up, le ho tobolaka lihlopha tsa 'mino le ho letsatse meropa, le ho etsa ntho ea mofuta ofe e leng teng ka eona; 'me basali ba matha kantle mono, ba batla ba hlobotse le ntho eohle ese, le ho tantša lifulurung, le lintho; fihla pheula moea oa motjeko. Be, ke hantle, u kena moeeng oa eona. Ke moea oa liabolosi. [Phutheho e re, "Amen."—Mohl.] Ke thabela ha le itse, "Amen," hobane ke 'nete. Ke tla e paka ka Bibele. Ke hantle. Ho lokile.

¹³⁶ Ho re, "Be, ha ke e lumele, moena." Be, uena, ha se seo u se buang, kapa seo ke se nahantan.

¹³⁷ Ke seo Lentsoe la Molimo le se bolelang. Ke phetho. Leo ke Lentsoe la ho qetela. E, monghali. O itse, "Ekareha le rata lefatše, kapa lintho tsa lefatše, lerato la Molimo ha le le a aha ka ho uena." Ke hantle. 'Me na le sa hopola mothoana, mosali oa khale ea rutileng morali oa hae tantše, le lintho tse kang tseo, 'me a theohela mono a chaea ka pel'a khosi, 'me a kopa hlooho ea Johanne Mokolobetsi; bana ba hae ba mashome a supileng ba shoele e le liotsoa 'me ba fanyehoa. U ka bona seo e se etsang joalo.

¹³⁸ 'M'a Moshe o ne a lula hae, a mo lebelo, 'me o mo rutile Lentsoe la Morena, na le bona se mo hlahetseng le ba habo. Ka eena ho tlide . . . Abrahama, le joalo-joalo, le ho theoha joalo.

¹³⁹ Ho lokile, ho ho uena ho etsa feela seo u se batlang. Uena, u motho ea lokolohileng ho ikhethela. U nka khato efe eo u lakatsang ho e nka. Hantle. Molimo o beile ka pel'a motho, joaloka t'simong ea Edene, Sefate sa Bophelo kapa sefate sa lefu. U etsa khetho ea hau. Le a bona? Sohle seo soule ea hau khahloang ke sona, ke seo u tlang ho se ja. Hlokomela joale. 'Me ba ne ba...

¹⁴⁰ Ke batla ho bala sena hape joale. O ne a le Moeeng. Moea oa theohela holim'a hae. O qala a bona lintho. Joale hlokamelang.

Ka nkaoa ke Moea ka letsatsi la Morena, 'me ka utloa...

Ke ile ka nkaoa ke Moea ka letsatsi la Morena, 'me ka utloa lentsoe le leholo ka mor'a ka, . . . la terompeta, . . .

¹⁴¹ "Terompeta." *Terompeta* ke "phatlalatso." Gabriele, ho Tleng ha Morena, o tla letsatsoe le terompeta ea Molimo. Ena e ne e le terompeta ea Molimo e letsoang. Ka mantsoe a mang, O itokisetsa ho tumisa pheletso ea Bosafeleng ea lefatše. Terompeta, ke'ng? "Itokise. Ke tlil'o u nea Tšenolo ea Jesu Kreste, ho e abela Kereke. Ke tla bua le uena, ka seo pheletso ea lefatše e tla ba sona, bakeng sa ba amohelang le ba hanang."

¹⁴² Terompeta ea Molimo. "Ela hloko!" Monna e mong le e mong, ha terompeta e lla, o phamola sabole ea hae o ema lebaleng, pasha. Terompeta!

¹⁴³ Pauluse o itse, "Ekareha terompeta e letsatsoe molumo o sa khethoeng, ke mang ea ka itlhophisetsang ntoa?"

¹⁴⁴ Ho tšoana le kajeno. Oh, moena, ha ke qamaka 'me ke bona likereke tsena tsohle tse batang, tse hoammeng, tse monyemo, le lintho tse joalo, "ba nang le sebopaho sa borapeli, ba mpa ba latola matla a jona," motho a ka itokisa joang? Ho hlahisa molumo o sa khethoeng.

¹⁴⁵ Ho re, "Be, joale, ke tla ingolisa le likereke. Ke tla tloha 'me ke leke Methodise, kapa Baptise, kapa Luthere, kapa Mapentekosta. Ke tla etsa ho hong. Ke tla nka khato ea mofuta." Oh, ha se eona.

¹⁴⁶ "Ekare ha motho a sa tsoaloe labobeli." Ha ke tsotelle haeba e le Methodise, Baptise, Mopentekosta, kapa seo a leng sona feela, eka khona u tsoaloe labobeli; u ke ke ua kena 'Musong. Amen.

¹⁴⁷ Shebang,

... *lentsoe, . . . la terompeta,*

Le re ho 'na, Ke 'na Alfa le Omega, . . .

¹⁴⁸ Ntho ea pele e tsoang . . . Mona o a tumisa, "Ke 'Na, oa Pele le oa Morao." Ntho ea pele, terompeta ea Molimo ha e utloahala, o ile a reteleha. 'Me A re, "Ke Alfa le Omega. Ke qala ho A ho isa ho Z. Ke ntho eo eohle joale. Ema 'me u mamele 'Na, nakoana." Ho lokile.

...oa pele le oa morao: ... Seo u se bonang, se ngole bukeng, (ke Buka ena eo re e balang) 'me u se romelle ...

¹⁴⁹ Ho kae? Se ngotsoe ka ho khetheha. Ho kae, morao mongoaheng? Che. "Ho kereke." Ho kereke. Hlokamelang.

... Seo u se bonang, o se ngole bukeng, 'me u se romele ho likereke tse supileng tse Asia; ...

¹⁵⁰ Etsoe, e ne e le papiso ea kereke. Joale, re tla kena tabeng eo, metsotsong e 'maloa, ho bontša kamoo Testamente ea Khale e tšoantsitsoeng mengoaheng e supileng. Mengoaha e supileng e hlophisitsoe, kapa likereke tse supileng tse beiloeng mona Asia, etsoe Bibele e ruta e hlakile, eona e ne e le seriti, kapa papiso ea Mengoaha e Supileng ea Kereke e neng e tla latela. 'Me ka thuso ea Molimo, le ka Bibele, nka paka hore mongoaha o mong le o mong oa kereke o fihlile hantle feela moo E boletseng hore o tla ba teng, hantle feela moo Bibele e boletseng hore o tla ba teng. 'Me re pheletsong ea mongoaha oa kereke ea ho qetela.

¹⁵¹ Le ho khutlela Testamenteng ea Khale, ho nka toro ea Daniele, le ho mo bontša pono ea 'muso oa Balichaba, kamoo a boneng setšoantšo se eme; hlooho ea gauta, sefuba sa silefera, le lirope tsa koporo, 'me maoto e le meomo ea tšepe le letsopa. Le ho bontša kamoo o mong le o mong oa mebuso eo o hlahlammeng o mong, hantle feela kamoo Bibele e boletseng. 'Me bona, hlooho ea khauta, Babylona; Bamede le Bapersia, Bagerike; le 'muso oa Roma; 'me 'muso oa Roma oa arohana mebuso e lesosome, Roma ea bochabela le ea bophirima, le joalo-joalo. 'Me ka hare ka mono, e le tšepe le letsopa, 'me li ne li hane ho tsoakana 'moho; Protestanta le Bokatoloke tlas'a puso e le 'ngoe ea Balichaba. 'Me o itse esita le ho leka ho roba matla a e mong, ba tla nyallana, hantle feela seo ba se etsang kajeno, hantle feela.

¹⁵² Le 'muso oo mehleng ea marena ao. Molimo oa Leholimo oa khephola Lejoe thabeng, e se ka matsoho a motho, le ileng la otla setšoantšo sena maotong le ho pshatla mebuso eohle ea Balichaba. 'Me 'Muso oa Kreste oa busa 'me oa rena, oa hola, oa koahela lefatše le leoatle le leholimo. Mebuso ea Balichaba ea nyamela joaloka mooko, joaloka lekhapetla seotlong sa ho pola lehlabula. Ke setšoantšo se se kakang seo re phelang ho sona. Ke 'nete.

¹⁵³ 'Me kajeno, le bona Katolike le Protestanta li nyallana, ba leka ho roba matla; ho holisa bana ba lona, le lokela ho tšepe ho ba holisa ka tsela *ena* kapa *eane*. Re tla kena ho eona, kamora nakoana, masiung a seng makae. Hlokamelang hoo, kamoo ho leng kateng, le kamoo (a mang) matla a tšepe a neng a laola a mang, ho e pshatla likotoana le ho silakanya.

¹⁵⁴ Empa Konyana ea tla ea ema. 'Me batho ba halalelang letsatsing leo...

¹⁵⁵ Le kamoo matla ao a Roma a haotseng har'a sechaba se seng le se seng. Ha ho matla a mang lefatšeng, 'me mokhoa o le mong

feela oo a ka haolang, ke ka Bokatolike, kereke ea Katolike, lefatšeng lohle, e phunyeletsa ka mono. Ke setšoantšo se setle, se seholo mona.

¹⁵⁶ Joale, ho lona Maprotestanta, roalang lieta tsa lona feela, hoba, moena, le khema le eona hantle. 'Me nka e paka ka Lentsoe la Molimo, le kene ho eona hantle feela hakaalo ka-ka ba bang bohle.

¹⁵⁷ Joale, shebang, "Oa Pele le oa Morao. Seo u se bonang, se ngole Bukeng." Joale, O itse ho eena:

...ngola sena bukeng, u ntoo se romela ho...
likereke tse-tse Asia; e leng Efese, le ho Sarda,
le...Pergame,...le joalo-joalo, le Philadelphia, le...
Laodisea.

¹⁵⁸ Joale re tla emisa mono, motsotsa kapa e 'meli, ho bona feela nako eo ke nang le eona, hoba ke batla ho finyella sehlohlolo sena sa ho qetela mona, holim'a Efese, le ho se hulela koana ho Laodisea, le ho bona haeba re sa bapisoa le kereke eona eo, le a bona, ho bona haeba re sa phele letsatsing lena.

¹⁵⁹ Oh, Kereke ea Molimo o phelang, tsohang le bonese. Shebang. Ha le hlokomele. Ekare nka be ke le chouka ka ntho ea mofuta, ka mokhoa o itseng. Ekare Moea o Halalelang o ka tla fihla ka matla a Oona a maholo le ho le thotela sebakeng moo le ka tšoarang Bibebe ena le ho re, "Ere ke shebe ka har'a Sena," holim'a le bona:

Lichaba li a pshatleha, Israele e a phaphama,
Lipontšo tseo Bibebe e li boletseng esale pele;
Matsatsi a Molichaba a baliloe, ka koluo a tse
phophothang;
"Khutlang, oho ba hasaneng, ha ha'bo lona."
(Ke hantle.)

Tsatsi la topollo le haufi,
Pelō tsa banna li qhibilisoa ke tšabo;
Tlalang Moea oa Molimo, mabone a lona a
kutoe a hlake,
Lelalang! Topollo ea lona e haufi.

¹⁶⁰ Ke hantle. Oh, ke letsatsi le le kakang. "Se ngole, u se romelle likereke."

¹⁶¹ Joale, joaloka ha Israele e kena ka botle ba eona, morao koana tšimolohong tlas'a Abrahama, ho theoha joalo ka bapatriareka. 'Me letsatsing la Akabe ea kena mengoaheng e lefifi, mongoaha o lefifi ka ho fetisia oo kereke e o boneng. Ho tsoa moo... 'Me nakong eo, kamoo Akabe a nyetseng Jesebele, a kenya borapeli ba litšoantšo ka har'a kereke ea molao.

¹⁶² Ntho eona eo, hoo, Protestanta e nyallane le Boroma lilemong tse sekete le makholo a mahlano a mengoaha e lefifi, Kerekeng ea Pergame, 'me ea tsoa ka borapeli ba melingoana, tlas'a sebopheho

sa Bokreste, ho tsoa ho kena mongoaheng o fofo o tlang ka pel'a rona. 'Me re ho 'ona hona joale. Re mongoaheng o fofo.

¹⁶³ Ha le e lumele? Joale ke tla lula fatše holim'a . . . lona batho ba ka ntile koana ka har'a likereke tse ling. Le ka har'a mongoaha o fofo. 'Me baevangeli ba lona ba parola lefatše, ho potoloha lefatše, ho rera lintho tse kang tseo; ha le tsoe tema kae kapa kae. Le a hoeletsa . . . Lona Mabaptise le a hoeletsa, "Milione o mong ka '44." Le tšoereng hoba le ba fumane? Ho kene feela mphi ea baetsalibe, mabitso a bona a ngotsoe bukeng (Ke hantle.), ba ipitsa litho tsa kereke ea Baptise. Ha se hoo feela, empa le tse ling, Mamethodise, MaCampbellite, le sehlopha sohle, ba hoammeng feela le ba monyemo. Billy Graham o fumane hoo, "Basokolloa ba likete tse mashome a mararo," a re, "livekeng tse tšeletseng . . ." 'Me liveke tse tšeletseng hamorao ha a fumana mashome a mararo. Hobaneng? Hobaneng? Ha ba ka ba fumana letho, le ho qaleng. Mphi ea baetsalibe feela, ba ngotse lebitso la bona bukeng, tlas'a sefitahlohoana sa tsoseletso.

¹⁶⁴ A re, "'Muso oa Leholimo o joaloka motho ea akhelang letlooa, leoatle. Eitseha a hula, o fumane ntho tsohle." O fumane likhulu tsa leoatle. O fumane kreifishi. O ne fumane li-terapine. O fumane liokho. O fumane likokonyana tsa metsi. O fumane linoha. Ke hantle. Empa ka mono, o fumane tlhapi e itseng, hape.

¹⁶⁵ 'Me ha motho a rera tsoseletso tlas'a matla le ponahatso ea Moea o Halalelang, letlooa le lahleloa holim'a batho. Ke hantle. Empa haeba e le kokoanyana qalong, ke kokoanyana qetellong ea tsoseletso.

¹⁶⁶ Haeba e le seokho sa metsi, ntho ea pele u a tseba, se tla thalatsa koana, ho re, "Ebile 'na, ha ke lumele linyee tsena tsohle tsa khale," se nt oo qhoma-qhoma se khutlela metsing.

¹⁶⁷ Haeba e le noha, o tla re, "Ke u boleletse ka eona," 'me o tla tloha a ikela. E ne e le noha le ho qaleng, tlhaho ea hae. 'Me a ke ke a fetoha letho le sele pele tlhaho eo e fetoloa.

¹⁶⁸ Monna a ke ke a ingolisa kerekeng, kapa a fulueha maikutlo kahohle, kapa ntho efe feela, 'me e be Mokreste. Eka khona e be tsoalo e tiileng ea Moea; botšepehi, ho shoa, ho lla ka bottlalo, ho robala mono ho fihlela a shoele habeli. Hopolang, bophelo bo ka tsoa lefung feela.

¹⁶⁹ Tlhaku ea koro, ha e ka lula, e itulela e 'notši, e ke ke ea bolela letho haese thootse e le 'ngoe eo ea koro. "Tlhaku ea koro ha e sa oele mobung, e lula e 'notši." Empa ha e oela teng, e a bola, e a silafala, 'me bobolung boo ho tsoa lefi la bophelo le e fang bophelo 'me e bea ho feta.

¹⁷⁰ Ekareha kereke ha e sa tsoaloe labobel, e shoa nqa melaoana ea eona le lithuto tsa bolumeli, le joalo-joalo, le ho tsoaloa bocha ke Moea oa Molimo, e tla fetoha ntho ea khale, e batang, e hoammeng, e se nang borapeli, e monyemo. Amen. Ke hantle. Eo ke therø ea mehla-ea-khale, ea moshoella, empa e tla u pholosa,

moena. Ke hantle. E tla u baballa ha lifefo li foka ka matla. Ho tsetela metso le ho theoa. Hohola mobu 'ohle pele u tšela konkreite ea hau; hlokomela, ke hantle, 'me litšepe tsa ankora li setlela tlase hantle 'me lia tiea. Oh, moena, re phela letsatsi le le kakang; mongoaha oa kereke o hoammeng, o monyemo! E, monghali.

“Ho likereke tse supileng,” ha thoe, “romela molaetsa ona.”

¹⁷¹ Joale, mongoaheng oa kereke eo, ba qalile ba kena; ba nyallana le borapeli ba melingoana. Ba etsa eona ntho eo joale; ba kene, ba etsa ntho eona eo. ‘Me ho tsoa moo, ho kena Bokresteng bo tsitsipaneng, ba qala ba qepha ho fihlela re fihla mongoaheng oa kereke ea ho qetela.

¹⁷² Joale, kereke ea seojaole-joale, eo re e bitsang “phutheho ea bolumeli.” Rona batho ba khalalelo, le a tseba, re ba bitsa, “ba mehla ea seojaole,” ‘me ba tsoela mono ‘me ba qala tsoseletso ea bona, le bona. U re, “Ha ba tsoe tema ea letho kae kapa kae.”

¹⁷³ Empa joale beang butle motsotsotso. Ebe re fumana’ng? Ha ho fumanoe letho, hofeta seo ba se fumaneng. Ke hantle feela. Haeba re ntse re qabana re kolokochana le ho itšoara joalo, re sa ntse re hata se sa batho; ho fihlela motho a ka theohela aletareng ‘me a loka nqa Molimo, ho fihlela a ka iphapanya linthoana le ho tsoelapele joaloka ha Mokreste a loketse. Pitsa e ke ke ea bitsolla ketlele mosili. Hantle. U se ke ua ba hlabela litlatse. Tloong re hloekise methati ea rona pele.

¹⁷⁴ Re tšoareleng, lona baeti, ke mpa ke patlotsa kereke ka Evangelikoana joale. Hlokamelang, ho lokile. Ke hantle seo le se hlokang.

¹⁷⁵ “Oh,” u re, “re O fumane.” Le ho nyolohela mono ho otlaka piano ka matla a bokhoni ba hau, le letotomo-tomo la meropa, le ho mathela holimo le tlase mokatong, le ho tsoa ho ngangisana le moahisane. Na u fumane letho? Uh-huh. Che, monghali. Re fumane ntho e fofo feela. Ha feela ‘mino o tsoella, re a matha. Ha ‘mino o emisa, re a emisa. Moena, u se ke oa bitsa mothaka e mong ntho e itseng; tloo re shebeng pel’ a monyako oa rona, pele. Amen.

¹⁷⁶ Ke a le bolella, re hloka tsoseletso ea mehla-ea-sekhale kamoo re neng re tloaetse tlase naheng, mohla ba neng ba inama ka sefahleho bosiu bohole. E ne e se ho tsoelapele joalo, empa mohla masoabi a ‘nete a borapeli; le ho se khutlele aletareng le ho lula, empa ho tsoa ho lokisa litaba le baahelani bao ba ba sitetseng, le ho e lokisa. Le a tseba hore ho joalo. Ho tlabol, empa, moena, ho tla u thusa. Ke hantle. U tlameha ho tseba seo, motsoalle oa ka. E, monghali.

¹⁷⁷ Fofo, ke boemo bo nyarosang boo kereke e ka kenang ho bona. Ha u sa hlokomele, Branham Tabernakel e batla e sekametse moo. Mamelang, le tseba lintho tsena. E ‘nile ea rutoa, selemo ka mor’ a selemo, ka mor’ a selemo, ka mor’ a selemo, kalaneng ena,

ho le lemosa lintho tsena tse tlang. Etsoe, Bibele e boletse ho tla nako eo ba tla tloha bochabela ho ea bophirimela, le leboea le boroa, ho leka ho fumana Lentsoe la 'nete la Molimo, 'me ba ke ke ba Le fumana. U mpe u ankoroe, moo u tsebang hore u eme kae.

¹⁷⁸ Empa motho ha a tsoetsoe labobel; a sa fehloa maikutlo, a sa futha chesho ea mofuta, a sa ngola lebitso la hae bukeng ea kereke, a sa ingolisa kerekeng e kholoahali motseng. Empa hantle-ntle a llile ka botlalo, 'me a kopile, ka meokho mahlong a hae, ho fihlela Molimo a tšoaretse libe tsa hae, moea oa hae o hloekisitsoe bophelong ba sebe, le ho mo tlatsa ka Moea o Halalelang; ka lerato le le kaalo, le borapeli, ho fihlela a khutlisa lithulisi tseo tsa khale tsa lithaere, tseo a li utsoitseng ho baahisane, le ho tloha a ea lokisa lintho tsena, le ho phela ka borapeli pel'a batho. Re ke ke ra fumana tsoseletso naheng ena ho fihlela re fumane seo.

¹⁷⁹ Kahlolo e qala tlung ea Molimo, ka Lentsoe la Molimo. Amen. E sang thekesebuka, empa Bibele. E sang seo kereke e itseng e se rutang thutong ea bona ea bolumeli, empa seo Molimo o se buang. Joale u tla fumana tsoseletso moo matla a maholo, le limakatso, 'me lipontšo, le meeka, le lintho tse ling tsohle, li tla etsahala.

¹⁸⁰ Re fofo. Hobane re fofo mongoaheng ona, Molimo o itse, "Ke tla u hlatsa molomong oa Ka." Mongoaha oa kereke ena o tla lahloa. Ho tla tsoa mesaletsa ho 'ona, e tlang ho bolokeha. Molemo e ka ba ho itšoaea, hantle bo, ho fumana haeba u le har'a masaletsa eo joale. Re tla kena ho eona motsotsong, ha Molimo o ratile. Hlokamelang feela joale.

*Eaba ke reteleha ho bona lentsoe le buang ho 'na.
'Me ha ke reteleha, (Shebang.) ka bona likandelare tse
supileng tsa gauta; . . .*

¹⁸¹ Kapa, "liluloana tsa lilampi," Segerike se rialo. Joale, eo ke phetolelo ea pele, hoba ba ne ba se na likandelare le e . . . Ba ne ba e-na le seluloana sa lampi. Joale, Likandelare tse Supileng tsa Gauta, re li bitsa joalo.

¹⁸² Joale, sehalalelong, moo mahobe a pontša; 'me bongata ba lona tšebeletso ea bolisa le a utloisia, le hoo. Le lona batho mona tabernakeleng, etsoe le ruta ke moruti ea khabane mona, lona—lona le tseba lintho tsena.

¹⁸³ Likandelare tse Supileng tsa Gauta, e ne e le . . . li ne li hlonngoe lilampinyana holim'a tsona, ho tukisa oli. Koana ho Zakaria, moo a boneng pono, kea kholoa e ne e le teng, 'me o bone sefate sa mohloaaare oa naha le sefate sa mohloaaare oa hae; Mojuda le Molichaba, khale koana pele ho lekhathie la Molichaba. Ba ne ba bolokile mafiso a gauta, 'me mafiso ana a gauta bobeli a matha a kena kandelareng e le 'ngoe ena mona e fepelang lilampi tsohle ka oli. 'Me o ne a sa utloisia kamoo lintho

tsena; mohloaare oa naha le mohloaare oa hae. 'Me mohloaare oa hae, ehlile, o ile oa thefuloa, 'me mohloaare oa naha oa hlomathisoa ho 'ona.

¹⁸⁴ 'Me oli eo ho lampi, *oli* e emetse "Moea o Halalelang," ka mehla. Re tla kena tabeng eo, mabapi le ho tšoaea batho, Labohlano bosiu. Hlokamelang, empa oli ena e emetse Moea o Halalelang. Lebaka leo re tlolang bakuli ka oli, hobane e emetse Moea o Halalelang.

¹⁸⁵ Bibele e boletse, ho Tšenolo khaolo ea 6, mohla kotlo e neng e haola, o itse, "Tekanyo ea koro ka peni, le tekanyo tse peli tsa haresa ka peni; empa u se ke ua senya veine ea Ka le oli ea Ka." Ekare re ka nka Tšenolo ra e phahla, liveke tse 'maloa, ra kena ho eona, hore veine eo le oli ke mang. "U se ke ua senya veine ea Ka le oli ea Ka. U se ke ua e atamela." Amen.

¹⁸⁶ Joale, hlokamelang likandelare tsena tsa gauta. Oli ena e ne e fepela likandelare tsena. Joale, oli e ne e tšeloa ka har'a lampi, ho tuka. Joale, Aarone o ne a... E ne e le mosebetsi oa hae ho khantša lilampi tsena. 'Me lilampi tsena li ne li lokela ho hotetsoa. E tšoareng joale. Shebang. Le apare hlompho, le mamele. Lilampi tsena li ne li tšoanelo ho hotetsoa ka mollo o hotelitsoeng ke Molimo. Bara ba Aarone ba ne ba kene ka mollo osele, eaba Molimo o ba bolaela monyako; ke hantle, mollo osele. Mollo o simolotsoeng ke Molimo!

¹⁸⁷ 'Me hlokamelang, joale, likandelare li matha li kena ka har'a seqha. Kandelare e 'ngoe e ne e le *ena*, peli, tharo, 'ne (holimo koana), hlano, tšeleta, supa, *tjena*. Joale, likandelare tseo tsa gauta mona, joaloka ha a bolela metsotsong e 'maloa.

¹⁸⁸ Ha re baleng ho ea pejana, mohlomong re tla e fumana. 'Me le mamele seo a se buileng joale. Ho lokile. "'Me hlooho ea Hae..." Kea kholoa ke etile temana ea 12 mono pele, "Likandelare tse Supileng tsa Gauta." Temana ea 13:

'Me har'a likandelare tse supileng tsa gauta e mong
ea joalo... Mor'a motho, a apere seaparo se hohobang
maotong, a itlamile lifubeng ka senyepa sa gauta.

Hlooho ea hae e ne e le joalo ka—joalo ka... moriri
oa hae o ne o le mosoeu joaloka boea, ... bosoeu joalo
ka lehloa; 'me mahlo a hae a ne a le... malakabe a
mollo;...

¹⁸⁹ Joale, ha re emeng mono motsotso feela, hoba re ke ke ra tlohela setšoantšo seo mono ka mokhoa oo. Shebang likandelare tsena tse emeng mona joale. Be, likandelare tseo, joaloka ha re tla fumana hamorao, li emetse Mengoaha e Supileng ea Kereke. Li emetse Efese, Pergame, le ho theohela ho Filadelfia, le ho isa ho Laodisea; Mengoaha e Supileng ea Kereke.

¹⁹⁰ 'Me e 'ngoe le e 'ngoe ea likandelara tsena e ne e na le nkhonyana ea oli e lutseng mono, 'me oli ena e tuka holim'a

kandelare ena. Joale mohla kandelare e le 'ngoe e neng e hotetsoa ke mollo oa Molimo, ba nkile kandelare eo 'me ba hotetsa e 'ngoe, ba ntoo e bea fatše; le ho hotetsa e 'ngoe; 'me e 'ngoe e ne e hotetsoa ke e 'ngoe, ho tsoa ho e 'ngoe, ho tsoa ho e 'ngoe, ho fihlela kandelare ea ho qetela. Hlokomelang, oli eona eo.

¹⁹¹ Joale, ena Mengoaha e Supileng ea Kereke, e qala ka Efese, le Thiatire, Pergame, le ho tsoella. 'Me Moea o Halalelang, e leng Oli ea Molimo, o theohetse holim'a kereke tšimolohong, Efese, Kereke ea Efese, eona e ne e le kereke ea mohau. Lona Mabaptise le loketse ho hoeletsa "amen" mono. 'Me hape ka kereke ea mohau, e leng Efese, 'me lengolo la Baefese le re hlakisetsa, hore re ne re le bomang pele lefatse le theoa. O tšolohile mono, 'me ba amohela Moea o Halalelang.

¹⁹² Empa ema motsotso, moena oa ka oa Baptise, ebe ba O amohetse joang? Ba O fumane joang? Ka ho ingolisa le kereke? Le ka mohla. Ba O fumane ka kolobetso ea Moea o Halalelang. U re, "E, Moena Branham, ke hantle." Ho etsahetseng ho uena mohla O neng o theohela holim'a hau?

¹⁹³ Lemohang, 'ona Mollo o tukisitseng oli mono, Efese, o e tukisitse Thiatire; 'ona Mollo o tukileng mono, oa e tukisa Pergame; o tukile joalo, ho ea fihla Mongoaheng oa Kereke ea Laodisea. Oona Moea o Halalelang, o hotelitsoeng ke Molimo 'ona oo, ka Mollo o tšoanang. 'Me Mollo o tšolohileng Pentekosta o hotelitse kandelare, Kereke, mongoaheng o mong le o mong, hantle ho theosa joale.

¹⁹⁴ Empa bothata ba eona, rona Mabaptise, rona Mamethodise, re morao koana holimo *mona*, re leka ho nka ntho ea nalane, 'me Kereke ke ena e theoha e tsamaea tlase *mona*. Ke hantle. Ke hona moo re siiloeng morao. Kereke e 'ngoe le e 'ngoe, enereha e qala, e ne e se na . . .

¹⁹⁵ Shebang Luthere, hlabollong ea pele. Tsoseletso e kakang, Luthere. Shebang, ke tšoere thekesebuka ea hae lapeng. Kamoo monna eo a reketlileng tlas'a matla a Molimo! Kamoo a lumetseng pholiso ea Khalalelo, a E amohela ka seqo sa hae; o lumetse matleng a Molimo, le ho feta moo, a ba a bua ka lipuo, Martin Luther. Ke hantle feela. Martin Luther o buile ka liteme.

¹⁹⁶ 'Me eaba mongoaha o latelang o a theoha, John Wesley. John Wesley o entse hona hoo. Mohla a ntseng a rera, o itse, "Mantsoe aa ao ke a bebenyang ke afe, athe ha ke a tsebe?" Ke hantle, ho bua ka liteme; o lumetse pholisong e Halalelang. 'Me eitseha a fihla Amerika, likereke mona tsa mo tšoara joaloka ha li tšoara bahalaleli-bathetheli kajeno, ba mo ntšitse, likerekeng. 'Me ba rera Evangeli kantle mono, 'me ba oele tlas'a matla a Molimo, ba ba ba robala fatše, bosiu bohle khetlo le leng.

¹⁹⁷ 'Me buka ea John Wesley ka sebele, eo ke e tšoereng lapeng joale, o ne a kaletse pere tsatsi le leng, ho ea rapella mosali ea kulang, eaba pere e a oa 'me ea robeha leoto. Eaba o theoha pere,

a nka lefiso la oli, a tlola pere ka oli, a e kalla a ikela. Oona Mollo o tukang mono.

¹⁹⁸ Empa le e theoletse sebopehong sa neeletsano ea mofuta, 'me Moea o Halalelang o ntse o tsoela pele. Hantle. Ke hantle.

¹⁹⁹ 'Me ka har'a kereke ea Methodise, "Phoso e teng ka bona," eona by-... buka ea bona e itse, "baa rutleha." 'Me ba ne ba qala ba tloha, 'me ba reketla ba tlola, 'me ba itšoere *joalo*, likopanong tsa bona tsa litente le lintho, Mamethodise. Khele, moena, hola John Wesley a ka hlaha temeng, a ka hlajoa ke lihlong ke lona, a ka le latola; a ka le qopetsa hamonate ka Evangeli ka sephali sa Evangeli eo a kileng a e rera.

²⁰⁰ Ha se khale ha ke ne ke eme, pel'a seemahale, moo ba kileng ba lokolla lintja tseo, mohla a neng a rera e—e tsoalo e ncha, le joalo-joalo, le ntho eo. 'Me kereke e ikakasang ea Engelane ea mo sasaletsa ka lintja tseo. 'Me a re, "Letsatsi le ke ke la chabela hlooho ea hau makhetlo a mararo, ho fihlela le mpitsa ho mo rapella." 'Me o entse joalo; 'me a shoa. Ke hantle. Ehlide.

²⁰¹ Ke seo re se hlokang kajeno. Re hloka Methodise ea mofuta oo. Re hloka Baptise e 'ngoe e kang John Smith, ea lutseng phaposing 'me a sotleha le Molimo, 'me a rapela bosiu bohle, ho fihlela, mahlo a hae a ruruhihabohloko, hoseng, mohatsa'e a ba a mo tataisetsa tafoleng, ho ea ja.

²⁰² Oh, re etsa'ng kajeno? Ho ema kantle koung hantle, ka sakrete ka hanong; athe ke motikone ka kerekeng, le ho theoha le ho itšoara joalo; ho ea lishoung tsa litšoantšo, le ho shebella litheleboshene bosiu bohle; le ho ngala kereke; ho tsuba, ho noa, ho becha, ho mathela mejahong ea lipere, le ho ipitsa Mabaptise. Matlakala kaofela!

²⁰³ Seo re se hlokang kajeno ke tsoseletso e 'ngoe ea mehla-eakhale, e rometsoeng ke Molimo, ea Moea o Halalelang. Amen. Ha ke bolele... Ha ke leke ho le fehla maikutlo. Ke a tseba hore ha le a fulueha maikutlo, empa, moena, eo ke 'nete. Ke ho leka ho fetisetsa ntlha ho lona. Ke 'nete. Ke seo re se hlokang. Ho lokile.

²⁰⁴ Joale, eo ke Bibele. Ke seo Moea o se buang, le a bona. "Likandelare." Ho lokile. Joale temana ea 13.

'Me har'a likandelare tse supileng tsa gauta ka bona...ea kang Mora motho,...

²⁰⁵ Eng? E mong ea kang Eena. E ne e le mang? Monyaluoaa oa Hae. E mong ea kang Eena. Shebang kamoo ho neng ho le kateng.

... a apere seaparo se hohobang maotong,...

²⁰⁶ Khalalelo ea Jesu Kreste e Mo apesitse. "O hlatsoitse libe tsa rona Maling a Hae ka Sebele." Ho lokile.

... a itlamile sefubeng (ha se monna; mosali) *ka senyepa sa gauta*. (Evangeli e neng e kakatletse matla le khanya ea Molimo holim'a 'Mele oa Kreste.)

²⁰⁷ Oh, ke setšoantšo se setle hakakang seo re se tšoereng mona ho se nahanisisa. Sheba mona.

... *hohobang maotong, 'me a itlamile sefubeng ka senyepa sa gauta.*

Hlooho ea hae le moriri oa hae li ne li le tšoeu joaloka boea, . . . bosoeu joaloka lehloa (ho loka, khalalelo; bosoeu bo lekanya hoo); *le mahlo a hae . . . joaloka malakabe a mollo;* (Ho sheba ka nqane ho eona hantle.)

²⁰⁸ U se ke oa leka ho ipatela Eena. O a tseba hore u mang, moo u leng teng, le seo u se entseng. E, monghali. O bona ntho e 'ngoe le e 'ngoe. Oho Molimo . . .

²⁰⁹ Re na le metsots e 'maloa feela ha nka fihla ho mongoaha ona o mong oa kereke, ha re ka khona. Hlokamelang.

'Me maoto a hae a ne a tšoana . . . koporo e benyang, . . .

²¹⁰ *Koporo kamehla "kahlololo,"* le a tseba; aletare ea koporo, le noha ea koporo, le tse joalo. Koporo e bua ka kahlololo. Maoto a Hae, ke hona, Kereke ea Jesu Kreste e lutse holim'a kahlololo e Halalelang. Kreste ea shoang sebakeng sa rōna, Ea Lokileng o lefa kahlololo ea rōna holimo mono, mono . . . ka pel'a Molimo, le ho shoa joaloka moetsalibe sefapanong, 'me soule ea Hae ea nyolohela liheleng. 'Me Molimo, ha o a ka oa lesa Mohalaleli oa Oona ho bona ho bola, oa Mo tsosa ka letsatsi la boraro, bakeng sa tokafatso ea rona; Ea lutseng letsohong la Hae le letona joale, Moprista e Moholo ea ka angoang ke maikutlo a mefokolo ea rona; o tla khutla ka mokhoa oo A ileng Leholimong ka 'ona, ho amohela Kereke e tlottlehang e Itokisitseng, e hlatsitsoeng ka Mali le ho tsoaloa labobel. Ha se le—ha se le pono eo. Amen. Ho lokile. "Joaloka koporo e benyang," kapa, joale shebang, "ea Hae . . . 'me . . ."

'Me maoto a hae a ne a le joalo . . . koporo e benyanang, e ka a hlenne seboping; (Manya kaofela a ntšitsoe.) *le lentsoe la hae . . . molumo oa metsi a mangata.*

²¹¹ Hlokamelang, ke Kereke e buang le Eena joale, *metsi.* Tšenolo 17:15 e itse, "Metsi a bolela matšoel le bongata ba batho." Joale, "Lentsoe la Hae," kapa Sepheli sena se neng se eme moo se shebahala tjena, Kreste ka har'a Kereke ea Hae, joaloka Monyaluo le Kreste ha ba le Bang, joaloka monna le mosali ha ba le bang; Kereke le Kreste ba bōpeletsoe hammoho le Motho a le mong, Moea o Halalelang o tšoanang.

²¹² 'Me lintho tseo Kreste a li entseng, le Kereke e a li etsa. Na le a e bona? Kereke eo e ntle mono ka khalalelo, ka matla, ka boholo, ka lipono, lipontšo, le meeka. Ntho e 'ngoe le e 'ngoe joaloka ha A entse, ke ena e holim'a lefatše; ho isa thoriso eohle ho Molimo, ho re, "Ke sitoa ho etsa letho Ntate a sa Mpontše; empa O Mpontšitse, 'me ke ena." 'Me re a tla, le a bona, lintho tsena li ea etsahala.

²¹³ Joale, Kreste, ho bopellooa Bonngoeng.

...’me lona *lentsoe*...*oa metsi a mangata*...

Batho ba bangata, ha se a le mong feela; e ne e le Kereke eohle, Likereke tse Supileng tse bopeletsoeng ’moho ’Meleng o le mong o moholo o lopolotsoeng oa Morena. Mamethodise, Mabaptise, Presbeteriene, bohole ba tsoetsoeng labobeli ka Moea o Halalelang, ba bua ka matla a Molimo, oo ke ’Mele. Oo ke ’Mele.

’Me o ne a tšoere letsohong le letona la hae...

²¹⁴ “Letona.” Ntho e ’ngoe le e ’ngoe ka Bibeleng e tšoere moelelo ho eona, le a bona.

...*letsohong le letona la hae linaleli tse supileng* (joale Ke—Ke Khosi): ’me molomong oa hae ho tsoa sabole e bohole e leolitsoeng ka n̄ga tse peli: ’me lifahleho *tsa hae li ne li tšoana le letsatsi le phatsimang ka matla a lona*.

²¹⁵ Joale, “Molomong oa Hae ho tsoa sabole e bohole e leolitsoeng ka n̄ga tse peli,” ho tsoa molomong oa Enoa ea emeng mono, Kreste le Kereke joaloka a le mong.

²¹⁶ “Letsohong la Hae O ne a tšoere linaleli tse supileng.” ’Me le tla bona metsotsong e ’maloa; ke batla ho fihla ho eona, ho lumella Bibele ho bolela seo e neng e le sona. E ne e le bareri ba supileng, moreri a le mong ho mongoaha o mong le o mong oa Mengoaha e Supileng ea Kereke, ba tsoang, ba tšoaroe ka letsohong la Hae le letona. Amen. Ke eo moo A leng teng. Ho ne ho le mangeloi a supileng, manqosa a supileng, le le leng ho kereke ka ’ngoe. Le a e fumana?

²¹⁷ Ke moo, O eme mono.

...’me molomong oa hae ho tsoa sabole e bohole e leolitsoeng ka n̄qa tse peli:...

Sabole e hlabang ka n̄ga tse peli ke’ng? Baheberu, khaolo ea 4, e itse, “Lentsoe la Molimo le bohole, le fetisa sabole e leolitsoeng ka n̄qa tse peli, esita le ho isa mokong oa masapo, ’me ke Moahloli oa mehopolo ea kelello.” Ho lokile.

Etseha ha ke ’mona, ka oela holim’ea ka...ka oela maotong a hae eaka ke shoele. ’Me a bea letsoho la hae le letona holim’ea ka, a re...Se tšabe; ke ’na oa pele le oa morao:

*Ke ea phelang, ’me ke na be ke shoele; ’me, bona, ke phela kamehla le mehla, Amen; ’me ke na le linotlolo *tsa lihele le...lefū*. (Eo ke Jesu. Joale hlokomela.)*

Ngola tsena tseo u li boneng, le tse leng joale, le lintho tsena tse tlāng ho ba kamorao ho mona; (Ho lokile.)

’Me sephiri sa linaleli tse supileng tseo u li boneng letsohong la ka le letona, ke...letsoho, le likandelare

*tse supileng tsa gauta. Linaleli tse supileng ke mangeloi
a supileng a likereke tse supileng: . . .*

²¹⁸ Ooh! E tšoareng. “Mangeloi a supileng ke basebetsi ba supileng ba likereke tse supileng.” Ho ne ho e-na le kereke ea moetapele oa Efese. Joale ha Molimo o ka lumella, ’me re ka tsoelapele ka sena, ’me re sa nke *Letšoao La Sebata*, nka le bontša e mong le e mong oa bona, hantle ho theohela mongoaheng ona oa ho qetela, ka tsela efe—tsela eo ba neng ba le ka eona; ho le bontša Kereke ea Filadelfia, eona e ne e le Methodise, John Wesley; ho le bontša e—e Kereke ea Thiatire, hang ka morao ho Pergame; eona e ne e le Martin Luther, le ho theosa le mongoaha, le ho bontša e mong le e mong oa bona ba tlileng ’me ba tlisitse molaetsa, ba thea molaetsa lefatšeng.

²¹⁹ ’Me hantle ho theohela Molaetseng oa ho qetela, kajeno, ke hantle, moo Molimo o rometseng Lengeloi le tsoang Leholimong, mohlanka oa Hae o netefalitsoe, le ho romella e mong le e mong Molaetsa. Ena e tla be e se kereke. E ke ke ea eba mokhatlo matsatsing ana a qetelo. Hoba, Molimo o beile mokhatlo shelofong, ’me bohole le elelloa taba eo. ’Me le eme ho fihlela re qeta hosane bosiu, holim’*a Letšoao La Sebata*, ’me le bone moo kereke ea lona e leng teng, le a bona, le mokhatlo oa lona.

Joale hlokometlang likereke.

...’me likandelare tse supileng tseo u li boneng ke
likereke tse supileng. (Ke tsona likereke.)

²²⁰ ’Me *linaleli*, etsoe, O tšoere naleli ka ’ngoe. Joale shebang. Na re ka ema motsotso feela? Kea tseba ke saletsoe ke metsotsotso e ka bang leshome le metso e ’meli ho fihla mona ’me ke batla ho finyella khaolo ena hantle mona, le ho e bala eohle, haeba ho se letho le sele. Ke batla ho le tlisetsa sena. Naleli e ne e le mosebeletsi, le mosebeletsi ea tlotsitsoeng ka Moea o tsoang Holimo.

²²¹ Na u a elelloa hore u emetse naleli Leholimong, ’me naleli e ’ngoe le e ’ngoe Leholimong e emetse uena? Na u tsebile hoba Molimo o boleletse Abrahama ha thoe peo ea hae e tla ba joaloka linaleli tsa Leholimo? Pele e ne e le lerole la lefatše, ebe moo tsohong e neng e le linaleli tsa Leholimo, tse se nang ho baloa. Na le hlokometse seo?

²²² Na le tsebile hoba Jesu e ne e le Naleli e Khanyang ea Meso, Naleli e kholohali har’*a linaleli tsohle tsa Leholimo?* Oh, Alleluia! Ha ke e nahana, moea oa ka o tlolakisoa ke thabo. Ke Eo! Mono ka setšoan sa Hae, ka pel’*a Sefahleho sa Hae*, re tla be re lutse teng ka letsatsi le leng, Alleluia, mohla lintho tsa lefatše lena li fetileng.

²²³ Empa, mamelang, Lengolo le leng le mphihlelang. Daniele o boletse . . . Ha A itse, “Koahela . . .”

²²⁴ Eitseha a bona Lengeloi lena le theoha, le roetse mookoli hloohong ea Lona; ho bea leoto le le leng lefatšeng, le leng holim'a leoatle; le ho phahamisa matsoho a Hae, le ho hlapanya ka Ea phelang kamehla le mehla. Eitseha mantsoe ao a supileng a utloahatsa tsa ona... Lialuma tse Supileng tsa utloahatsa mantsoe a tsona. O itse, “Koahela; se ke ke sa tsebjoa ho fihlela letsatsing la ho qetela.” O itse, “Empa mohla sephiri sena sa Molimo se loketseng se be se phethehile, mohla linthro tsena li tlāng ho senoleloa Kereke; le ho hlapanya ka Ea phelang kamehla le mehla, hore nako ha e sa tla ba teng.”

²²⁵ Mamelang seo A se buileng mono ke hona. O itse, “E-ea, Daniele, u koahele Buka.” Le a bona? “Etsoe u tla phomola, ’me u tla ema matsatsing a ho qetela, kabelong ea hau. Empa ba bangata ba isang ba bangata ho lokeng ba tla phatsima ho feta linaleli kamehla le mehla.”

²²⁶ Ke moo, “linaleli,” basebeletsi bao ba supileng. Baboleli ba supileng, ho haola le Mengoaha e e Supileng ea Kereke, e bopiloeng ke lilemo tse likete tse peli.

²²⁷ Ho qala lilemong tsa pele tse likete tse peli, tšenyeho ea pele ho moroallo; lilemo tsa bobeli tse likete tse peli, ho tla ha Kreste la ho qala; lilemo tsa borao tse likete tse peli, sa botšeleta, ke ho Tla ha Kreste labobel; le Mileniamo, le bofelo, phomolo ea letsatsi la bosupa.

²²⁸ “Ho kereke...” Oh, ana le ka ’mamella metsotso e ’maloa hape? [Phutheho e re, “E.”—Mohl.] Joale, ha ke batle ho le khathatsa, empa ke tla bala ka potlako joale. “Ngolla lengeloi...” Joale hlokamelang, taba ena O e bua ka ka kotloloho joale. ’Me re tla fetela koana ho Pergame ’me re nke oa ho qetela... Ke bolela, ho Laodisea, ’me re ntoo koala. Hosane bosiu re tla e nka ho tloha mona, holim'a *Letšao La Sebata*.

Ngolla lengeloi la kereke ea Efese... (Ea pele.)

²²⁹ Joale hlokamelang, mohla Jesu A neng a eme a phuthulotse matsoho a Hae. Nthoana eo ke sa batleng ho e siea ke ena, ho lona. Utloang. E beeng leihlo. O eme lipakeng, mono ke bohareng, ba Likandelare tse Supileng tsa Gauta.

²³⁰ Joale, hola ke ne ke eme *mona*, ’me likandelare e le seqha se teetse hare, *mona* ka letsohong le leng la ka ke moo ke le otlolotseng teng, ’me le leng ke *lena*, ka pontšo ea sefapano, hoba e ne e le ka sefapano ho tlisitsoeng Kereke.

²³¹ Ke Enoa moo A emeng teng; le mookoli holim'a hlooho ea Hae, e le selekane. “Ke hlabile selekane sa Ka le Kereke, ka Abrahama, ka Peo ea hae, bohole ba bitsitsoeng.”

²³² Moena oa ka, bosiusg bo bong, ha a amohela Kreste, o itse, “O se ke oa nqophella le ka mohla, Bill.” A re, “Ha Molimo o bua le ’na...”

Ka re, “U ke ke oa tla ho fihlela A u bitsa.”

²³³ “Ha ho ea ka tlang ho ’Na, a sa bitsoa ke Ntate oa Ka.” Motho e mong o etsa ntho e itseng, a u hulela holimo, eo ke motho e mong. Empa ha Molimo a bua, u tla tla, u a bona. Ke hantle. Ho ema mono . . . “Ha ho ea ka tlang, a sa huloe ke Ntate oa Ka.”

²³⁴ Ke eo moo A emeng teng, “joaloka lejoe la jaspere le la sardone ho talinngoeng, oa pele le oa morao,” Benjamini le Rubene, bapatriareka bohole ba leshome le metso e ’meli. Le ka moo, Bibele, karoloana ka ’ngoe e nyallana hantle ka mokhoa oo, ntho e ’ngoe le e ’ngoe e phethahetse! Lemohang A sa ntse a eme mono, ho talinngoeng, hlokamelang se etsahalang. O itse E ne e le “Alfa le Omega,” E ne e le “Qalo le Qetello. Ea neng a le Teng, le ea leng Teng, le ea Tlang ho Tla.” O ne a tšoere letsohong la Hae le letona, joale, linaleli tse supileng.

²³⁵ Joale ke enoa O qalile Efese, ’me A qala a hotetsa kandelare. O e hotelitse mono. Ebe mongoaha o latelang, rea fumana, mongoaha kereke o latelang, o qala o fifala; mongoaha kereke o latelang o rothofala ho feta; ho fihlela mongoaha oa kereke ea bone, lilemo tse sekete le makholo a mahlano tsa mengoaha e lefifi. ’Me ho ella 500, 1500, kae-kae ka mono, ho qala ho fifala ho fihlela ba le holimo koana, ’me oa batla o tima.

²³⁶ ’Me, hlokamelang, o mong le o mong oa mengoaha eo ea kereke, O itse, “Ha u a ka oa latola Lebitso la Ka. Ha u a ka oa latola Lebitso la Ka. Ha u a ka oa latola Lebitso la Ka.” Empa mohla A neng a fihla ka lehlakoreng le leng la mengoaha e lefifi, ho re, “U na le lebitso la hobane ua a phela, athe u shoele.” O ne a hlophisitse. O ne a nkile lebitso le leng la bohata.

²³⁷ Shebang, hosane bosiu, seo antikreste a leng sona. O tšoere kolobetso ea bohata, ho etsa hore u lumele hore ke kolobetso ea Moea o Halalelang. O tšoere kolobetso ea bohata ea metsi (E, monghali.), e sa lumellaneng le Mangolo. O tšoere lintho tseo tsohle, ho lekaneng feela ho etsisa, ho etsa ka mano le bolotsana.

²³⁸ Shebang moo e tsoang teng. Hantle mono ke moo e qalileng, hantle ka mono; e tsoa ka lehlakoreng lena le leng ka *mona*.

Eaba O re, “U tšoere Leseli le le nyenayane feela,” Luther.

²³⁹ Eaba ho latela Wesley, le kamoo ho etsahetseng kateng mongoaheng oa hae. E qala e khanya ho feta.

²⁴⁰ Eaba, ho tloha mahareng a mongoaha oo le mongoaha oa ho qetela, O bea monyako. A beela ba tlang ho kena monyako o butsoeng. Eaba O re, “O ile a tloha a kena boemong bo fofo.” ’Me A e hlatsa molomong oa Hae. A nka masala, tsoho ea fihla, ’me A tsamaea le eona. Ke hantle.

²⁴¹ Ke Eo, o eme ka har’ a Likandelare tse Supileng tsa Gauta. Joale:

*Ngolla . . . kereke ea Efese u re; Ke tsena . . . ngola;
Ke tsena tsee boleloang ke ea tšoereng liinaleli tse*

supileng letsohong la hae le letona, ea tsamaeang har'a likandelare tse supileng tsa gauta;

²⁴² “Ke tseba mesebetsi ea hau.” Hopola, ha u a lebaloa.

*Ke tseba mesebetsi ea hau, le mokhathala oa hau,
'me...u sitoa ho mamella ba babe:...*

²⁴³ ’Me koana re mamella ntho efe kapa efe e mpe, ’me re e bitsa borapeli. “Oh, be, ba ea... Re kena kereke. Re lokile hakaalo ba bang bohle.” Ho ea hae hantle, ho lula lapeng Laboraro bosiu le ho shebella thelebishene, tsona likoti tsa lihele. Ke hantle. Le ho tsoa hantle le ho ea mamela lenaneo la lishou, u lutse ka koloing. Ho chesa haholo ho ea shoung, esita...ho ea kerekeng; esita le moreri o a koala, lehlabula le leholo. U re, “Ho chesa haholo ho ea kerekeng.” Ha ho joalo, ho tla ba hobe haholo, ho ea liheleng, moena. U tla ea, le leng la matsatsi ana, moo ho chesang ho feta moo. U mpe u mamele.

²⁴⁴ Ebe u ka khona joang? Moena, u ke ke oa jesa leeba pere e shoeleng, holane u tlamehile. Le ne le ka sitoa. Tlhaho ea lona e fapanie. Leeba ha le na nyooko. Ha le khone ho e sila.

²⁴⁵ ’Me motho ea tsoetsoeng labobeli, ke Moea oa Molimo, a ke ke a ja lintho tseo. Ha a khone ho e mamella. E tsoile kelellong ea hae. A ke ke a e etsa. Ha a khone.

²⁴⁶ U a e tseba. Nonyana tsa ’siba le le leng li fofa hammoho. ’Me, kajeno, lefatše le kereke li a itšoanelia, u...Ba bua ka ho tšoana, ba noa ka ho tšoana, ba tsuba ka ho tšoana, ba rohakana ka ho tšoana, ba apara ka ho tšoana, ba itšoara ka ho tšoana. ’Me bona, ha u khone ho khetha e mong ho e mong, ’me koana ho thoe u tiisitsoe ke Moea o Halalelang.

²⁴⁷ E matla haholo, moena, empa, ke a u bolella, e tla u fa Bophelo.

²⁴⁸ Thaka le leng, khetlo le leng, u kile a atamela sehlopha sa bareri, teng ba tšoere seminare, e bitsoang sekolo sa baporofeta. ’Me e mong oa bona a re, “Beang pitsa e kholo joale. Re tla ja tinare e itseng.” Ha thoe, “Elia o ile a nyoloha, monna eo a hlile a tšoere karolo tse peli.”

²⁴⁹ Ebile moo mothaka e mong a tsoang a ea kha lierekisi tse itseng—tse itseng, ’me a tlatsa foresekoto ka maraka a hlaha ’me aa pheha pitseng, ’me a qala a ptjatla. Khele, ba qala ba ja. Ba re, “Lefu le ka pitseng.” Liseminare tsena tse ling li batla li pheha joalo, le tsona. Ke hantle. Ho re, “Lefu le ka pitseng.”

²⁵⁰ Elia a re, “Emang motsotso, re tla hlokomela taba eo.” O a tloha ’me a kha phofo e tlalang seatla, ’me a e faha ka hare, hoo ha fetola lintho. Phofo, nyehelo ea phofo, “Jesu Kreste eena maobane, kajeno, le kamehla,” ho e thumisa ka ho lekana, bakeng sa nyehelo ea phofo, ’me e ile ea etsa phapang.

. . . o sitoa ho mamella ba babe: u bile u lekile le ba ipeileng bareri, kapa, baapostola, athe bao hase bona, 'me u lemohile hoba ba leshano:

²⁵¹ Ke seo A se buileng; ha se 'na ea e buileng. Ke Mo qotsa feela. Empa na le tseba seo Molimo o se batlang? Molimo o hloka kolobetso ea Moea o Halalelang, ho seng joalo u lahlehile.

²⁵² 'Me monna o tsoa mona ka li D.D.D.'s, le L.D.'s, le Ph.D.'s, le digarata tsa Bachulara, le ntho eohle e e setseng morao, 'me nako e 'ngoe ha a tsebe letho ka Molimo ho feta letho. Ke 'nete. Moena, seo ha se bolele letho. Empa lefatše lohle le re, "Be, moruti oa rona ke Ngaka ea Bolumeli." Oh, mohau. Ha e amane le Molimo ho feta—ho feta ho noa metsi; ha se le hakaalo. Ke hantle. Molimo ha o tsoetelle letho ka bokaalo ba Ph.D.'s, kapa D.D.'s. 'Me—'me na le tseba seo Bibebe e se bitsang . . . Joale, ona ha se motlae, hoba ha ke lumele ho e etsa tse joalo. Empa Bibebe e bitsa D.D., "ntja e shoeleng." Ke hantle seo Bibebe e se boletseng, "ntja e shoeleng." Ho lokile, ha thoe, "Ha li bohole." Ka hona, ebile, ho lokile.

Hape u na le sebete, 'me u mameletse bothata, ka baka la lebitso la ka . . .

²⁵³ Oh, ke batla ho e silakanya ka hare, le tla e fumana masiung a 'maloa, ha Molimo o ratile.

. . . mameletse bothata, 'me ha u a ka oa khathala.

²⁵⁴ "U ile oa Le tiisetsa hantle." Ho lokile. Hlokomelang.

Empa ke na le lintho seo ke se nyatsang ho uena, . . .

²⁵⁵ Joale, mona ke hona moo ke tlamehang ho e tlohela joale, nakoana feela, ho fihlela ke nyollela ntho ena hantle holimo mona re tle re khone ho e tšoara hosane bosiu.

. . . ke na le tse 'maloa seo ke se nyatsang ho uena, ke hobane u lahlile lerato la hau la pele.

²⁵⁶ Molato ke'ng ka tabernakele? Motho o lokela ho rialo, ha u kopana le motho, "Boiphihlelo ba hau ba Bokreste, bo u natefetse neneng ka ho fetisia?"

U tlamehile hore ebe u ka re, "Hona joale!"

²⁵⁷ "Be, boiphihlelo ba ka bo khabane bo ne bo le motšeо koana mohla ke neng ke amohela kolobetso ea Moea o Halalelang la ho qala, ha ke fihla."

²⁵⁸ Joale u re, "Oh, moena, u oeple mohaung." Ke hantle. Sheba.

. . . u lahlile lerato la hau la pele.

Ho bontsha hore tšimolohong ba ne ba tšoere ho hong, 'me ba e lahlile.

²⁵⁹ "Ha se ea qalang; empa e le ea tiisetsang ho isa qetellong, ke eena ea tla bolokeha." "Ha se ea . . . bohole ba reng, 'Morena, Morena,' empa e le ea etsang thato ea Ntate oa Ka." Oh, ereng

ke e lumelle ho thophothela metsotso e 'maloa feela. Ke buile ka potlako bosiung bona, le hona, ka hona tloong re e lese e thophothele metsotso e 'maloa feela, le a bona. "Ea etsang thato ea Ntate oa Ka." "Ea tiisetsang ho isa bofelong. Ea tiisetsang!"

²⁶⁰ Haeba motho a re, "Ke lumela hore eena, mothaka eo, ke moikaketsi oa khale."

²⁶¹ "Be, haeba le nahana joalo ka 'na, ke tla ngala kereke. Ha ke sa tla amana le eona ka letho." Ho lokile, ke moo. Le a bona? Hoo ho bontša moloho oa hau. Moena, haeba e ne e le koro qalang, e tla ba koro qetellong. U mpa u sa ka oa lula nako e lekaneng tlase mona. Ha u a ka oa lokisa ntho eo le ka mohla. Ke hantle.

Hopola hle moo u oeleng teng, . . .

²⁶² Khutlela morao 'me u hopole mohla u ne u ruile boiphihlelo u sa sebe motho. Phoso efe e hlahang kerekeng, ha u a ka oa lula methating ea moahelani mono oa bua ka kereke, le ho bua ka motho mang le mang, le ho phasoloha le ho ngala ho ea ingolissa kerekeng e 'ngoe. Che, oa na oa lula hantle mono, ka mamello 'me oa e rapelisisa, 'me Molimo oa e fetisa, le a bona.

Hopola . . . moo u oeleng teng, 'me u bake, . . .

²⁶³ Le a tseba ho "baka" ho bolela'ng, ha ho joalo?

. . . 'me u etse mesebetsi ea hau ea pele; . . .

²⁶⁴ Khutlela morao 'me u fumane boiphihlelo ba hau ba pele. Etsa lintho tseo u neng u li etsa tšimolohong. "Nyolohela aletareng, 'me u lokise litaba le Molimo," ka mantsoe a mang. Ke hantle.

. . . etsa mesebetsi ea hau ea pele; ho seng joalo ke tla tla ho uena kapele, 'me ke tla tlosa kandelare ea hau tulong ea eona, ha u sa bake.

²⁶⁵ Uh-huh, "Ha u sa etse joalo, kereke ea hau e tla pshatleha, e be litkotoana, ha u sa bake."

²⁶⁶ "Empa u na . . ." Oh, joale ke rona bana re fihla. Itšoarelleng ka thata. Mamelang ka hloko. Aparang seaparo sa lona sa kereke joale, 'me u theole sekhele sa hau. Mamelang. Hoba . . .

Empa u na le molemo ona, ke hore u hloile liketso tsa Banikola, tseo le 'na ke li hloileng.

²⁶⁷ "U hloile liketso tsa Banikola." Joale hlokomelang. Seo e beng e le "liketso" Efese, mongoaheng o latelang oa kereke, e ne e le a "thuto." Re tla e nka, hosane bosiu, "Banikola."

'Me ea nang le tsebe a utloe seo Moea o se bolellang likereke; Ea hloolang ke tla mo fa ho ja sefate sa ho phela, se kahara paradise ea Molimo.

²⁶⁸ Joale, temana, e latelang e qala ka Kereke ea Smirna.

²⁶⁹ Joale, "Banikola," ke hona moo re tla qala teng, hosane bosiu, e tsoa ho Tšenolo 13. Boprista ba Bonikola, kamoo bo galang

hantle mono Efese. 'Me ke hona moo mongoaha kereke oo o hloleheng, lilemong tse makholo a mararo tsa ona. Pele o e tsoa, Banikola ba qala ba iqalla thuto, boprista ba baena.

²⁷⁰ 'Me hape, tabeng ea pele, bo tsoa ho Nikolase, eena e ne e le mong oa e—e apo—... e mong oa... 'me eena... Ho Liketso khaolo ea 6, kea kholoa, le temana ea 5, ke moo a tlohileng 'me a thonya batikone. 'Me eaba ba nka enoa, e beng e le Nikolase mono, le ho qalisa mono 'me ba e bitsa Banikola, 'me ba qala ba hlophisa boprista. 'Me ho tloha moo ea fetoha a "liketso," seo ba neng ba se etsa, ho bua lintho tsena maipolelong, le joalojoalo. 'Me eaba ea eba "thuto" ka mona, 'me ea kena Babilona. 'Me ea fella tlase mona, khetlong la ho qetela, Bokreste bohole bo e phuthetse; ke mesaletsa e 'maloa feela e neng e tla pholosoa ho eona. Shebang 'me le bone seo e leng sona, hosane bosiu, ha Molimo o ratile.

²⁷¹ Oho, moena oa ka ea ratehang, khaitseli ea ka e ratehang, ho Eo ea ka khonang ho u boloka ho oa mohaung, ho Ea ka bolokang pelo ea hau ka mohau, A ke a t̄sollele mahlohonolo a Hae holim'a hau. Le ka mohla le se lebale hore re phela matsatsing a ho qetela a mongoaha oa kereke ea ho qetela, moo ho porofetiloeng e tla ba mongoaha kereke o fofo, oa pelo e sekheeqe feela ka Lona. 'Me u khaotse ho ba pelo-sekheeqe. Tloo ho Kreste ka 'nete, ka pelo ea hau eohle.

²⁷² Ha ke u eletse ho ingolisa le kereke efe. Taba eo ha e... Molimo o ke ke oa u botsa seo Kahlolong. Che, monghali. Ha O tsotelle kereke eo u leng setho sa eona.

²⁷³ O batla *uen*; ke motho ka bomong. 'Me u tlameha ho tsoaloa labobeli le ho amohela kolobetso ea Moea o Halalelang, ho seng joalo ho felile ka uena. Le a bona? U mpa u bapala kereke, u ntse u lekisa, ho fihlela u fumane boiphihlelo ba ho tsoaloa labobeli kannete.

²⁷⁴ 'Me mono, Ea neng a eme mono, le Likandelare tse Supileng tsa Gauta, ho haola le Mengoaha e Supileng ea Kereke, 'me ona Moea o Halalelang o hotelitseng Kereke mono, o E hotetsa mona.

²⁷⁵ Joale, baqopitsi ba ne ba le teng ka har'a kereke eo, le bona Banikola mono, le ho theosa le mongoaha kereke o mong le o mong, balekisi, ho fihlela e fihla tlase mona ho fihlela e le qubuhali ea pherekano e le 'ngoe ea mokhatlo. 'Me Molimo o rahela ntho eohle kantle, le ho ho nkela mesaletsa ea batho Khanyeng.

²⁷⁶ Morena a le hlohonolofatse. Taba ena e batla e le thata, metsoalle, empa e molemo. E tla u thusa le ho u baballa ho oa mohaung. Joale, u se ke oa likoloha, ka ho re, "Moena Branham o pharile kereke ea heso." E ne e sa rereloa kereke efe. E ne e reretsoe uena feela, joaloka motho. Ha ke...

²⁷⁷ Haeba u le setho sa kereke ea Baptise, u mpe u be Mobaptise oa 'nete ea tlatsitsoeng ka Moea o Halalelang. Haeba u le

setho sa kereke ea Methodise, e-ba Momethodise oa mannete ea tlatsitsoeng ka Moea o Halalelang, leha e ka ba eng. 'Me u ke ke ua fetoha sekhobo; u tla ba tlotla kerekeng efe kapa efe, kapa tikolohong efe kapa efe, tlotlisong ea Molimo.

Morena a le hlohonolofatse joale, re sa ema, haeba le rata.

²⁷⁸ Mong'a Bophelo ea Ratehang, ka mor'a ho bala Lentsoe la Hau, re ema ka tšabo. Ho hlokomela hoba letsatsi le leng palo ena bosiung bona e tla . . . Re tla E utloa khatisong ea teipi, joaloka ha ho etsahetse, ka Letsatsi la Kahlolo. Re tla etsa joang ka eona? Ka ho bona re phela mongoaheng ona oa ho qetela, lefifi le aparetse hohle, ke nako e kakang. Ho bona ho Tla ha Morena, mehlolo e hlahang, "maqhubu a maholo a bilohang; lipelo tsa banna lia ema, letšoho; tsieleho ea nako; khohlano pakeng tsa lichaba."

²⁷⁹ Ba bangata ba re, "Oh, ke utloile ntho eo lilemo." Empa na Lengolo ha le a bolela ba tla rialo, "Ha ho phapang linakong esale mohla bontata rona ba neng ba robala"? Ha re tsebe haeba re le mathuleng hantle. A ka fihla le pele le chaba.

²⁸⁰ 'Me, Ntate, hore ke letsatsi lefe kapa hora efe, re a tseba, hore likhole tseña tse romotsehang tsa bophelo tseo re totobang holim'a tsona li tla khaoha tlas'a rona. Meea ea rona e fokolang e tla leketla koana sekaleng, holim'a Lentsoe la Molimo, le karabelo ea rona nqa seo re se utloileng re se balileng.

²⁸¹ Re loketse joalo, Morena, ho ema joale le ho itekola. 'Me ere banna le basali, bashanyana kapa banana, ba sa eme mona ka har'a letšoelenyana lena, bosiung bona, ba hlaphohetsoe ka kelello e seli, ba ke ba nahane ka botebo feela joale. 'Me haeba ba eso tsoaloe labobeli, ba ke ba rere pelong tsa bona hona joale, "Nke ke ka ja leha ele ho noa ho fihlela U ntlatso ka manna ao U ba tlatsitseng ka ona ka Letsatsi la Pentekosta. Ho fihlela lefatše le eshoa, 'me ntho e 'ngoe le e 'ngoe e lutse maemong a bobeli haese Uena, Morena oa Ka, 'me lerato la ntho e 'ngoe le e 'ngoe le tla fela. Empa falatsa lerato lohle la lefatše ho 'na, 'me ho tloha kajeno lena ke be oa Hau ka botlalo." Aba sena, Morena.

²⁸² E-ba le batho ba sa ea malapeng a bona. Oho Molimo, hopola bahloki, bafumanehi naheng ea rona, moeeng, bao ba lapileng.

²⁸³ Molimo, hlahisa basebetsi, hohle. Ba tlatse ka Moea o Halalelang, le ho ba romela, ba ntse ba rera, Morena, joaloka malakabe a mollo. Ha re tsebe hora efe . . . Re feta tseleng ena hang feela. Re fetoha motho ea shoang hang feela, 'me ho lebohuoe Molimo ka seo. Empa, bophelong bo latelang, ha re sa tla bolela Evangelii bophelong bo latelang bo tlang ho tla; empas re tla nyakalla Evangeling, le bao ba mengoaha ba E amohetseng; le Molaoli oa Sehlooho, Morena oa rona Jesu Ea nang le tokelo eohle, 'me thoriso eohle e isoe ho Eena kamehla le mehla. Amen.

²⁸⁴ Molimo a le hlohonolofatse. Retolohang le tsukutlane ka matsoho, re sa bina *Ho Bokoe Tlamo E Tlamang*, ha le rata.

Ho bokoe tlamo e tlamang
Lipelō tsa rōna ka lerato la Bokreste;
Kopano ea mehopolo e joalo
E tšoana le ea Holimo koana.

Pel'a Terone ea Ntate,

²⁸⁵ Joale, tsukutlanang ka matsoho. Ke metsotso e leshome
feela, nako, hobane joale mabone a khantšitse ka matla. Bohle
le tsukutlane ka matsoho, le ikele lapeng, le nyakalle, 'me
le khutle hosane bosiu. Ka mashome a mararo ka morao ho
supa, hloohong, re tla qala tšebeletso, ha Molimo o ratile. Ho
babatseha hakakang . . . ? . . .



MENGOAHA E SUPILENG EA KEREKE SST54-0512
(The Seven Church Ages)

Molaetsa wona, ka Moena William Marrion Branham, o rerilwe sethatong ka Senyesemane Laboraro mantsiboya, Motsheanong 12, 1954, Branham Tabernakele, Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2023 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org